

LA CARTA DEL APÓSTOL SAN PABLO A LOS ROMANOS

Pablo escribe a la iglesia de Roma

1 ¹Yua Pablo m̄jaare yu queti joo Roma macanare. Caroaro m̄jaare yu ñuu roti. Jesucristo c̄ paabojari majocu yu ā, c̄ ye quetire buiobojari majocu. Jesucristo c̄ cabue j̄goricarā apóstol na cairā mena c̄nipaure yu cacūwī Dio, caroa quetire c̄ ye quetire cabuio teñapaure.

²Tirum̄pure atie queti c̄ Macu c̄ cabaipere caī buio j̄goyeyeyupi Dio. To bairi c̄ ye quetire buiori maja ānana Dio nare c̄ caïrore bairona caucayupa. ³To bairi atie queti yu cabuio teñarije Dio Macu ye ā. Camajocu buiaū Ūpaū David ānacu p̄rami c̄ñupi mani Ūpaū Jesucristo. ⁴C̄ cabai yajiro bero Dio Esp̄ritu Santo c̄ camajirije mena Jesure c̄ catunu catiopyupi. To bairo āc̄u mani camajare mani cañooñupi Dio, “C̄ Macuna āmi,” mani caī majiparore bairo īi. ⁵Caroaro mani átibojami Jesucristo. C̄ j̄gori yu cacūñupi Dio, apóstol anigumi īi, yu ye quetire c̄ buio teñaato īi. To bairi to c̄nacā yepap̄u camajare na yu cabuio teñaro j̄caarā c̄ ye quetire caapirā Jesucristore api n̄cub̄gogarāma.

⁶⁻⁷M̄jaa Roma macana quenare cacūñupi Dio, Jesucristore caap̄jarā na āmaro īi. Seeto maimi Dio m̄jaare. M̄ja nipetirāre caroaro atie queti joo m̄jaare yu ñuu roti. Mani Pacu Dio caroaro ani wariñuuriquere m̄jaare c̄ joato. Mani Ūpaū Jesucristo quena to bairona caroare c̄ joato m̄jaare.

Pablo quiere visitar Roma

⁸Atie mai m̄jaare yu buio j̄go: Camaja ati yepa nipetiro macana Jesucristore m̄ja caap̄ija n̄cub̄gorijere buio batema. To bairo m̄ja c̄niere na caī buiorijere apii Diore, “Ñuu majuucōa,” c̄ yu ĩnucu. Jesucristo j̄gori m̄jaare yu jenibojanucu Diore. ⁹Seeto yeri t̄goña ocabutiri Diore yu āti n̄cub̄go, c̄ Macu c̄ c̄nie quetire buio teñaū. To bairi majiimi Dio to c̄nacā nina nairoacā c̄re m̄jaare yu cajenibojarijere. ¹⁰To bairi Diore c̄ jeni n̄cub̄goū, oc̄o bairo c̄ yu ī jeninucu: “Dio, Roma macana t̄p̄u yu c̄aāp̄ere m̄u caboata top̄u yu c̄aāp̄ere quenooya.” Tirum̄p̄na m̄ja t̄p̄ure yu c̄aāganucubar̄u. ¹¹Dio yere m̄jaare yu buioga, netob̄jaro Jesu yere m̄ja camaji ocabuti nemoparore bairo īi. To bairi seeto m̄jaare yu t̄jugac̄p̄u. ¹²To bairi m̄ja t̄p̄u yu caejaata Jesure mani caapi n̄cub̄gorijere mani ame buiogarā. To bairo ame buiorā netob̄jaro Jesure mani api n̄cub̄go ocabutigarā.

¹³Ocõo bairi wame mũa camajiro yu boo: Aperã quena judío maja câniquênare Jesu ye quetire na yu cabuioro caapiujawã jĩcaarã. To bairi na caapiujarore bairo mũa tu macana quena na apiujaaato ïi, capee niri mũa tũpũre yu cáaágabapũ. Aágabacu quena yu cáaá majiquẽpũ. ¹⁴Camaja to cânacã majare Jesu ye quetire na cabuiopau yu ã. Macaa cânã, macaa câniquêna quena, cabue majirã, cabue majiquêna quenare nipetirãre na cabuiopau yu ã Jesu ye quetire. ¹⁵To bairi mujaa Roma macana quenare caroa queti Jesu yere seeto mũaare yu buioga.

El poder del evangelio

¹⁶Camaja noa atie Jesucristo ye quetire caapi nũcũbugorãre na netoo catiomi Dio. Cũre cabooquêna menare na cu capopiyeyebopere na netoomi cũre caapi nũcũbugorãre. Jesucristo jĩcauna ãmi manire canetoo majii. To bairo camajare cu canetoo majirijere tũgoonãri yu boboquêe camajare tie quetire na buioũ. Tie queti judío maja jettore buiorique câni jũgoyupa. Na bero judío maja câniquêna quenare buiorique ã. ¹⁷Ocõo bairo majuu ã tie queti: “Noa Jesure caapi nũcũbugorãre, ‘Caroarã, caroorije mana ãma,’ na ï tũjumi Dio. To bairo cu caĩ tũjurã cũre caapi nũcũbugocõa ãna ãma.” To bairona ï uca turique ã Dio Wadarique câniepũre, “Caroarã ãma,” Dio cu caĩ tũjurã. “Cũre caapi nũcũbugorã ãma naa. Cũre api nũcũbugorã to cânacã rũmũ cacaticõa ãna anigarãma,” ï uca turique ã.

La culpa de la humanidad

¹⁸⁻¹⁹Caroorije cána macare na cabai netoo nũcarije, caroorije na cátiere seeto tũjũgateemi Dio mũnũrecoopũ cácu. Na quena cariape Dio cu câniere na camajipe anibajupa. Dio cu câniere mani camajipe majirioquêe. To bairo cũre na camajibope to cânibato quena na majuuna caroorije átigarã cajocaquêtie macare, Dio ye queti macare apigateema. To bairi seeto na popiyeyegũmi Dio. ²⁰Diore tũjuquetibana quena, “Seeto camajii ãcumi Dio,” mani ï maji, ati mũnũrecoo, ati yepa macaje cu cátajere tũjũri. Dio cu cânicõa anie, nipetiro cu cáti rotirije quenare mani maji, cu cátajere tũjũri. Nemoopure ati yepa macajere Dio cu cátrato bero nipetiro cu cátajere tũjũrique ã. To bairi, “Atie Diona cu cátaje ãno,” ï majiri Dio cu câniere majirãma camaja nipetirã. To bairi tiere majibana quena cũre cabai netoo nũcarã ãma. To bairo na majuuna na cabai netoo nũcarije wapa na popiyeyegũmi Dio. Na maca, “Dio, mũ câniere majiquestibana mũre jã caapi nũcũbugoquẽpũ, to bairi mũ capopiyeyequetiparã jã ã,” ï majiquestigarãma rooro cáтана maca. ²¹Cũ câniere majibana quena Diore áti nũcũbugoquêema. Caroaro cu cátajere tũjubana quena tiere, “Caroaro jãre mũ cátibojayupa,” Diore cu ïquêema. Ape wame macare tũgoonãri ï jocariquere tũgoonãma. To bairo baibana na yeripũre jĩã netobujaro Diore camajiquêna anicõama. ²²“Seeto camajirã jã ã,” caĩrã anibana quena camajiquêna majuu ani nutuapa. ²³To bairo Diore, cayajiquêcũre cu áti nũcũbugogaquêna na majuuna na cawericarã macare áti nũcũbugoma. Camaja, cawurã, waibũcurã, ãña, pinoare bairã cânare we nũcocõari na áti nũcũbugoma.

²⁴To bairo na cáto, “To cõona caroorije na majuuna na caboorije cána na anicõato,” na ïimi Dio. To bairo na cu caĩro bero na majuuna caroorije boboorije majuure átinucuma. ²⁵Dio ye cariape câni wame apiujagaquetiri caĩ jocarije macare apiujama. Dio ati mũnũrecoo macana nipetirore cátaacu

jetore cū na cáti nūcūbūgope aninucubapa, to cānacā rūmū cānicōa ācū macare. Na maca Diore áti nūcūbūgoquēnana Dio cū carupeoricarā macare áti nūcūbūgonucuma.

²⁶To bairo cátinucurā na cāno maca, “Baiyupa na majuuna seeto caroorije cáticōana na āmaro,” na ĩimi Dio yua. Cāromia caroaro manapū cūtajere booquēnana na majuuna caroorije ame áti epenucuma. ²⁷Самуа quena to bairona caroaro nūmo cūtajere booquetiri na majuuna самуа anibana quena caroorije ame áti epecōama cabooboorijere. To bairo na majuuna seeto caroorije na cátie wapa cariape na popiyeye majuucōagūmi Dio to bairo rooro cānare.

²⁸Diore na catūgoōñaguēto maca, “To cōona caroorije jetore catūgoōñarā na anicōato,” ĩimi Dio. To bairo Dio nare cū caĭro bero caroorije jeto áticōa aninucuma boboquēnana. ²⁹Ocōo bairi wame áti aninucuma caroorije to cānacā wamere: Apeye unie cacūgorā anibana quena apeye uniere boo neto tūgoōñama. Aperāre, “Rooro nare manī áticōato,” ĩ tūgoōñanucuma. Aperā ye tūju ūgoo punijininucuma. Camajare na ĩama. Ame wada neto paima. ĩ jocarique ĩnucuma. Ame tuti paima. Rooro wada pai yoja teñama. ³⁰Aperā caroorije na cátiqūētie to cānibato quena, “Rooro cána āma,” na ĩ wada painucuma. Diore tūgoōñagateema. ĩ punijini yūnucuma. “Caroau, camajii yū ā,” ĩ tūgoōñari to bairona ĩtori buioma. Seeto tūgoōñama caroorije na cátipere, caroorā aniri. Na pacuare na bai netoo nūcanucuma. ³¹Cañuurijere majjagaquēema. “Ocōo bairo jā átigarā,” caĭrā anibana quena na caĭri wamere áti ūjagaquēema. Aperāre na mai tūjuquēema. Aperā rooro na cūtajere majjiritiquēema. Rooro catamuorāre na bopaca tūjuquēema. To cānacā wame caroorije átinucuma, Diore cabai netoo nūcarā aniri. ³²To bairona cabairāre caroorā na cabai yajiri paupure na regūmi Dio. Nare cū carepere camajirā anibana quena to bairona cáticōa āna aninucuma. Seeto wariñuuma aperā nare bairona caroorije na cátiere bairije na cáto tūjuri.

Dios juzga conforme a la verdad

2¹Mūjaa aperā na cátiere tūjuri, “Caroorije cána āma,” nare mūja ĩ. To bairo nare caĭrā anibana quena nare bairona caroorije mūja āa. To bairi, “Caroorije cána āma, nare cū popiyeyato Dio,” mūja caĭata, “Jā quenare cū popiyeyato,” caĭrāre bairona mūja ĩ. ²To bairona caroorije cānare nipetiro na cátiere tūju majimi Dio. Na cátie nipetirijere caroaro tūju majiri cariapena na popiyeyegūmi Dio na ye wapa. Cariapena capopiyeyei āmi Dio. ³To bairi mūja quena nare bairona anibana quena, “Caroorā āma naa, nare popiyeyegūmi Dio,” mūja ĩrā. To bairo ĩcōarina, “Jā macare popiyeyequetigūmi,” jocarāna mūja ĩ tūgoōñarā. ⁴Caroorije mūja cátie wapare mūja popiyeyega patowācaquēcumi Dio. To bairi nemoona mūjaare cū capopiyeyequētiere tūjurā, “Manire popiyeyequetigūmi,” ĩ tūgoōñaqueticōaña. Mūjaare mai tūjuri, caroorije mūja cátiere mūja catūgoōña jutiritipe boomi. To bairi cūre mūja caapiujapere yuūmi Dio. To bairi popiyeyega patowācaquēcumi. ⁵Cūre mūja caapiujapere mūjaare cū cayuubato quena Diore mūja apiujagaquēe. Caroorije mūja cátiere mūja jutiriti yeri wajoagatee. To bairi netobujaro mūja popiyeyegūmi Dio. Cariapena cūre cabooquēnare caroorije na cátaje wapa nare cū capopiyeyeri rūmū cānorū mūja átigūmi. ⁶Camaja nipetirāre caroorije na cátaje wapa cōona cariapena na popiyeyegūmi Dio. To bairi caroa cáтана

quenare caroaro na átibojagumi Dio cariapena caroa na cátaje cõona. ⁷To cãnacãuna caroa, Dio yere, cõ catujũ wariĩuuriere cáticõa aninucurãre na joogumi Dio cõ tũpũ caroa cãnicõa aninucurijere. ⁸Aperã na majuuna na caboorije cána macare na popiyeyegumi Dio. Cariape macaje Dio ye quetire apiũjagaquẽema. Caũuquẽtie macare átinucuma. To bairi na popiyeyegumi Dio, na cáti aniere booquẽcũ. ⁹Camaja nipetirã caroorije cána tũgoõñarique pai jutiriti popiye tamũogarãma. Judío maja to bairona, judío maja mee quena nare bairona tamũogarãma. ¹⁰⁻¹¹Nipetirã caroare cána macare na tujũ wariĩuumi Dio. Camaja quena to bairona caroa cãnare na tujũ nucũbugogarãma. Caroa ãnajere na joogumi Dio. Judío majare, judío maja mee quenare to bairona na joogumi Dio, jĩcarore bairo jeto camajare catujũũ aniri.

¹²To bairi caroorije na cátaje wapa na popiyeyegumi Dio, Moisépure cõ carotiriquere camajibatanare tiere na cabai netoo nucarije wapa. Aperã quenare cõ carotirique camajiquẽna quenare na popiyeyegumi Dio caroorije na cátie wapa. ¹³Cõ carotiriquere caapiricãrã anibana quena tiere cátiquẽnare, “Caũuurã ãma,” na ĩquẽemi Dio. Cõ carotiriquere cána macare, “Caũuurã ãma,” na ĩ tujumi. ¹⁴To bairi judío maja cãniquẽna Moisépure Dio cõ carotiriquere cacũgoquẽna aniri, tiere camajiquẽna ãma. Majiquetibana quena na majuuna caroare cána na cãmata Dio cõ carotirique to caĩrore bairona cána ãma. Dio cõ carotiriquere camajiquẽna anibana quena caroare cána na cãmata na majuuna na yeripure, “Caroare cátiye ã,” caĩ majirã ãnama. ¹⁵To bairi na majuuna na yeripure caroare cáti majirã aniri Dio cõ carotirique cõ caĩ cũricarore bairona cáti majirã ãnaa baima. To bairi na yeripure caroare cáti majirã anibana quena caroorije áama na majuuna. To bairo na majuuna caroorije áti, nemoona, “Átie caroorije ã. ĩNope ĩrã tiere jã ájupari?” ĩ tũgoõña majirãma. Caũuuriere macare na cápata, “Átie caroare jã ápũ,” ĩ tũgoõña majirãma, na yeripure caroa cáti rotirijere camajirã aniri. ¹⁶To bairi camaja caroorije na cátajere na tujũ cõõñari na popiyeyegumi Dio caroorãre na cõ capopiyeyeri rũmũ cãnopũ. Caroorije na cátajere catujũ cõõñapãre cõ cũgumi Dio Jesucristore. To bairi na cabuioagaquẽtie quenare tujũ maji peticõagumi Jesu. Ti wamere yũ buionucu Jesu ye quetire buio teñau.

Los judíos y la ley de Moisés

¹⁷Mũjaa judío maja cána, “Moisépure Dio cõ cáti rotiriquere cõ cacũricarã aniri cõ yarã majuu jã ã,” mũja ĩ tũgoõñabapa. ¹⁸Dio cõ carotiriquere camajirã aniri cõ caboorijere camajirã mũja ã. To bairi, “Caroa cátipere jã tujũ beje maji,” mũja ĩ tũgoõñabapa. ¹⁹To bairo ĩ tũgoõñarã, ocõo bairo mũja ĩ tũgoõñabapa: “Dio yere camajiquẽnare camajorã jã ã. Caroare cáti majiquẽnare na jã buio maji caroa macaje macare. ²⁰To bairi aperãre camajorã jã ã. Camajiquẽnare, cawimarã quenare cabuerã jã ã. To bairi Dio cõ carotiriquere cacũgorã aniri camajiriorijere cariapere cãni wamerire jã maji peticõa,” mũja ĩ tũgoõñabapa. ²¹To bairi mũjaa aperãre camajorã anibana quena ĩnope ĩrã mũja majuuna aperãre mũja cabuioore bairona mũja átiqetinuicuti? Aperãre, “Jee rutiquẽja,” caĩ buiorã anibana quena ĩnope ĩrã mũja majuuna mũja jee rutinucuti? ²²To bairi, “Áti epericarã cutiqueticõãña,” caĩrã anibana quena mũja majuuna ĩnope ĩrã mũja áti epericarã cutinuicuti? Aperã na majuuna na cawericarãre Dio cãniquẽnarena jeni nucũbugoma.

Na cajeni n̄c̄ub̄gorijere t̄juteebana quena ñnope ñrã na wericarãre na cáti n̄c̄ub̄gori wiiri macajere m̄ja jee rutiti? ²³ “Moisépure Dio c̄u carotiriquere camajirã majuu já ã,” caĩrã anibana quena tiere m̄ja bai netoo n̄canucu. To bairo m̄ja cabai netoo n̄c̄arijere t̄jurã aperã maca oc̄o bairo m̄ja ñrãma: “Nare bairona cabairã já anigatee. Diore can̄c̄ub̄gorã na cãmata já maca Diore cáti n̄c̄ub̄gorã já anigatee.” To bairona ñrãma to bairo jocarãna Diore m̄ja can̄c̄ub̄gotorijere t̄jurã. ²⁴ To bairona ñrique ã Dio Wadariquer̄: “M̄jaa judío maja Dio c̄u carotiriquere cacugorã anibana quena caroorije cána m̄ja ã. To bairo m̄ja cãno t̄jurã aperã judío maja cãniquẽna maca Diore booquetiri, c̄u ñ epe tutima. C̄u n̄c̄ub̄gogaquẽma,” ñ ucarique ã.

²⁵ Dio c̄u carotiriquere m̄ja cápata caroaro m̄ja baigaro judío majare, circuncisión na caĩrije cãnare. To bairi c̄u carotiriquere m̄ja cátiquẽpata judío maja cãniquẽna circuncisión cátiquẽnare bairona cabairã m̄ja ã, Diore camajiquẽnare bairona. ²⁶ Noa Dio c̄u carotiriquere caapijarã, “Ȳu yarã ãma,” nare ñ t̄jũumi Dio, judío maja mee quenare circuncisión cátiquẽna na cãnibato quena. Judío majare Dio na c̄u caĩ t̄juboricarore bairona na ñ t̄jũumi Dio c̄u carotiriquere cãnare. ²⁷ M̄jaa judío maja Dio c̄u carotirica wame c̄o cacugorã, circuncisión cána anibana quena Diore m̄ja apiujaquẽe. To bairi aperã maca circuncisión cátiquẽna maca Dio c̄u carotirique caĩrore bairona na cápata oc̄o bairo m̄ja ñgarãma: “Jocarãna Dio c̄u carotiriquere cacugorã ãma. Tere apiujaquẽema,” m̄ja ñgarãma. ²⁸ Judío maja oc̄o bairo m̄ja ñ m̄jaa: “Judío maja já ã. Circuncisión jãre cájupa, Dio yarã majuu anigarãma ñrã.” To bairo caĩricarã anibana quena judío maja majuu mee m̄ja ã, Dio yarã majuu cãniquẽna m̄ja ã Diore m̄ja caapiujaquẽpata. ²⁹ Judío maja majuu, Dio yarã oc̄o bairo ãma: Na yeripure caroorije na cátajere cajana rericarã ãma, Dio yarã já anigarã ñrã. To bairi Dio c̄u carotirique caĩrore bairona cána ãma. Na ãma judío maja majuu, Dio yarã. “Caroarã ãma,” na ñ t̄jũ wariñũumi Dio nare. Camaja maca nare to bairo na caĩ t̄jũ wariñũuquẽtie to cãnibato quena to bairona na ñ t̄jũ wariñũumi Dio na unare. “Judío majocu cabuiaric̄u, circuncisión cátaçu yu ã, to bairi Dio yaçu yu ã,” caĩ ñc̄u anibacu quena judío majocu majuu me ãmi Diore c̄u caapiujaquẽpata.

3 ¹ To bairi, “Judío maja anibana quena Dio yarã majuu mee m̄ja ã,” yu caĩrije apiri, “Baiyupa judío maja já cãnie circuncisión já cátaje ñuuquẽto,” ñ t̄gooñaquẽja. ² Aperã jugoye Dio c̄u Wadariquere c̄u cacũricarã mani ã. To bairi judío maja mani cãnie ñuu majuucõa. ³ Capãarã judío maja Dio Wadariquere caapi n̄c̄ub̄goquẽna ãma paro. Na caapija n̄c̄ub̄goquẽtie to cãnibato quena Dio maca c̄u caĩrore bairona cácu ãmi. ⁴ To bairi c̄u caĩrore bairona átigumi Dio. Mani camaja caĩ jocarã aniri mani caĩri wamere bairona mani átiq̄etinucu. Dio maca cariape ñmi. Caĩ jocaçu me ãmi. To bairona ñ ucarique ã Dio Wadariquer̄:

M̄na Dio, jocu mee cariape m̄ ñnucu. To bairi oc̄o bairo m̄ ñ majiquẽema camaja: “Rooro áami Dio. ‘Oc̄o bairo yu átigu,’ c̄u caĩrica wame c̄o átiq̄ẽemi Dio,” m̄ ñ majiquẽema, ñ ucarique ã.

⁵ To bairi mani camaja rooro mani cáti netorijere t̄jurã, “Jĩcauna ãmi Dio cañuu majuu,” mani ñ maji. Ti wame ñ majiri oc̄o bairo ñ t̄gooñabanama jĩcaarã: “Dio manire c̄u capopiyeyeaata rooro átiboũmi c̄u majuuna,” ñ t̄gooñabanama. ⁶ To bairo caĩ t̄gooñaquẽtie ã. Cariape áami Dio, camajare caroorije na cátaje wapa na popiyeyei. Caroorije mácu ãmi

Dio. Cũ majuuna caroorije cácu cu cãmata, cariape cátiquẽcu cu cãmata ati yepa macanare cariape na tũju beje majiquetiboumi Dio. Cariape na ye wapa na popiyeye majiquetiboumi.

⁷Aperã ocõo bairo irãma tunu: “Caĩ jocarã mani cãnibato quena mani popiyeyequetigumi Dio. Caĩ jocarã mani cãniere tũjurã, ‘Dio jĩcaũna ãmi caũuũ majuu, caĩ jocaquẽcu,’ ĩ tũju majigarãma aperã maca. To bairo caĩ jocarã ãnaa, ‘Dio jĩcaũna cariape cu cãniere na majiatio,’ caĩrãre bairo mani bai. To bairi caroorije cána, caĩtorã mani cãnibato quena, ‘Rooro mũja áa,’ manire ĩquẽcumi Dio,” ĩ tũgoõnarãma jĩcaarã. “To bairi, ‘Rooro ĩmi. Cũ yũ popiyeyegũ,’ yũre ĩquẽcumi Dio,” ĩ tũgoõnabanama. ⁸“To bairona ĩ buionucuma Pablo jãa,” jã ĩto buiorãma aperã. “‘Caroorije mani áato,’ Dio macare, ‘Jĩcaũna ãmi caũuũ,’ camaja cũre na ĩ majiatio irã, ĩ buionucuma Pablo jãa,” jã ĩto buiorãma jĩcaarã. Jocarãna ĩ buiorãma ti wamere. Ti wamere jã ĩqueti majucõa. Ti wamere caĩrã cariapena na popiyeyegumi Dio caroori wame na caĩ buiorije wapa.

Todos somos culpables

⁹“Mani judío maja aperã netoro caũuurã mani ã,” ĩ tũgoõnaqueticõaña. Mania judío maja caroorije cána mani ã. Aperã judío maja cãniquẽna to bairona caroorije cána ãma na quena. Jĩcarore bairona mani bai. Judío maja, judío maja cãniquẽna quena to bairona mani bai. Cabai buicuna jetona mani ã mani camaja nipetirã. “Mani camaja nipetirã to bairo jetona caroorije cána mani ã,” mere yũ ĩ buio ucawũ. ¹⁰Ocõo bairo ĩ Dio Wadarique mani cabairije cutiere:

Ni ũcu jĩcaũ caũuũ maami.

¹¹Camaja nipetirã Dio yere api majiquetinucuma.

Dio cũ cãniere majigaquẽema.

¹²Dio cũ caboorijere átigaquetibana nipetirã caroorije cána ãma.

Nii jĩcaũ ũcu caũuurije cácu maami.

¹³To bairi maja ope cajita jã bipeya mani ope caũnirijere rooro mani catũgoõnarore bairona rooro tũgoõnami Dio na rijero mena na caĩ wadarijere. Na rijero mena rooro ĩto pai wadanucuma. Tie caroorijere ĩ wadarã, ãna cũ capunirore bairo jeto rooro puniri wamere ĩ wadanucuma.

¹⁴Aperãre tũgoõña punijini, wada painucuma.

¹⁵Ñee wapa manona nare jĩama aperãre.

¹⁶Noo na cáaáti pauri cõo aperãre na rooye tuu popiyeye, na catũgoõnarique paio roque na átinucuma aperãre.

¹⁷Aperã mena caroaro ani majiquẽema.

¹⁸Diore nũcubugoquẽema, ĩ ucarique ã Dio Wadariqueũ.

¹⁹Moisẽpũre cacũũupi Dio judío majare cũ carotiriquire, yũ carotiri wame cõo na áparo ĩi. To bairi cũ carotiriquire majibana quena tiere mani cátiquẽpata, “Caroorije mácu, Diore cabai bui cutiquẽcu yũ ã,” mani ĩ majiquẽe. “Dio cũ cáti rotiriquire yũ cátiquẽto tũjuũ yũ popiyeyegumi Dio, caroorije yũ cátaje wapa,” mani ĩ maji. Mani camaja nipetirã caroorije cána aniri mani majuuna ti wamere mani ĩ maji. ²⁰Nii jĩcaũ ũcu ocõo bairo cariape caĩ majii maami: “Dio cũ carotiriquire cáno cõona jĩca wame rũjaricaró mano yũ áa. To bairi, ‘Caroaro cácu mũ ã,’ yũ ĩgũmi Dio.” Ti wamere cariape caĩ ũcu maami. Dio cũ carotiriquire majicõari, “Caroorije cácu yũ ã,” mani ĩ maji.

La salvación es por medio de la fe

²¹⁻²² To bairi Dio cu carotiriquire cáti peo majiquēna mani cānibato quena, “Caroarā āma, caroorije mana āma,” mani ī tujūmi Dio. Jesucristore caapi nūcubugorā mani cāmata, “Caroarā āma,” mani ī tujūmi Dio. Ti wamere mani maji, cū ye quetire apiri. Tiruməpəna Moisé Dio cu carotirijere ucau tiere caī buio jugoyeyeyupi. Aperā quena Dio ye quetire buiori maja ānana to bairona caī buio jugoyeyeyupa. ²³ Mani camaja nipetirā caroorije cána mani ā. To bairi Dio cū caboorije cōna cáti peoquēna mani ā. To cānacā maja to bairo jeto caroorijere cána mani ā. ²⁴ To bairi noa Jesucristore caapiuja nūcubugorāre, “Cañuurā āma,” na ī tujūmi Dio. “Caroorije na cátiere Jesu nare cū cawapayebojaro maca na yu popiyeyequetigu,” na īmi Dio. ²⁵ Mani mai tujūri Dio cajooyupi Jesucristore caroorije mani cátie wapa, cū caríí re yajiparore bairo īi. To bairi Jesucristo manire cū cajooricure mani caapiuja nūcubugoro maca caroorije mani cátiere majiriomi Dio. Cajuogoyepu macanare caroorije na cátie wapa na capopiyeyega patowācaquējupi Dio, “Caroorije na cátie wapare yu Macu na bai yajibo jagumi,” ī tugoōnari. To bairi cū Macure cū cajooro majirā, “Cariape cácu āmi Dio,” mani ī maji. ²⁶ Ati rumuri macana to bairi wamere mani caī majiparore bairo īi cájupi Dio. To bairi noa Jesure caapiuja nūcubugorāre, “Cañuurā āma,” mani īmi Dio. “Caroorije na cátiere Jesu na cū cawapayebojaro maca cañuurā āma,” mani īmi Dio.

²⁷ To bairi mani majuuna ī tugoōna ocabūtiri, “Caroarā cácu yu ā,” mani ī majiqueti majuucōa. “Dio cū carotiriquire caĩrore bairo cáti ocabūtii aniri caroa yu ā,” írca wame quenare mani ī majiquēe.

Ti wamere mani majuuna mani caī majiquētie to cānibato quena, “Cañuurā āma,” mani ī tujūmi Dio, Jesure mani caapiuja nūcubugoro. ²⁸ “Dio cū carotirijere āna popiye jā āa,” mani caĩrije to cānibato quena, “Caroarā cána āma,” mani ī tujūquēcūmi Dio. Jesure cū mani caapiuja nūcubugorije macare tujūu, “Caroarā āma,” mani ī tujūumi Dio.

²⁹ Judío maja jetore na canetoo catiou me āmi Dio. Judío maja, judío maja mee quenare na canetoo catiou āmi. ³⁰ To bairi jīcauna camajare canetoo catiou aniri to cānacā majare canetoo catiou āmi Dio. To bairi nii cabouna judío majocu Jesure cū caapiuja nūcubugoata, “Cañuu āmi,” cū ī tujūmi Dio. To bairona nii cabouna judío majocu mee quenare Jesure cū caapiuja nūcubugoata, “Cañuu āmi,” cū ī tujūmi Dio. ³¹ To bairi Dio Moisépəre cū carotiriquire cajana rerā mee mani ā Jesure apiuja nūcubugorā. Jesure apiuja nūcubugorā Dio cū carotirica wamerena cána mani ā. Dio Moisépəre cū carotiriquire cáti peo majiquēna mani cānibato quena, “Cañuurā āma,” mani ī tujūmi Dio, Jesure mani caapiuja nūcubugoata.

El ejemplo de Abraham

4 ¹ Abraham mani judío maja nūcure Dio cūre cū cáti bojariquere mujaare yu buiopa. ² Abraham caroa cū cátiere tujū cōoñari, “Cañuu, caroorije mácu āmi Abraham,” cū ī tujūquetacūmi Dio cañuu cū cānibato quena. To bairo cū caī tujūata Abraham maca, “Yu majuuna caroa yu cátie wapa caroarā yure áami Dio,” cū caĩrije aniboricaro. To bairi Dio cū catujuro cariape, “Caroarā cácu, caroorije mácu yu ā,” ī majiquetacūmi Abraham. ³ Ocōo bairo ī Dio Wadarique: “Abraham Diore

caroaro caapi n̄cub̄ogoyup̄. To bairi, ‘Caroaro cácu āmi Abraham,’ c̄u caī t̄uj̄yup̄ Dio,” ī ucarique ā. ⁴⁻⁵Oc̄o bairo maca m̄jaare ȳu buio majiōra: J̄icau capaabojaure c̄u up̄au, c̄ūre capaa rotiī c̄u wapayei cawatoana c̄u jooqūc̄umi. Cariape c̄u capaa wapatarije macare c̄u j̄om̄i. Mani cawapatarije me ā Dio, “Caroarā āma,” manire c̄u caī t̄uj̄urijea. Caroaro mani cátaje wapa meere to bairo mani īmi. C̄ūre mani caapija n̄cub̄ogoriye macare t̄uj̄uri, “Caroarā āma,” manire ī t̄uj̄umi Dio. C̄ūre mani caapija n̄cub̄ogoro t̄uj̄uri, “Caroarā āma,” manire ī t̄uj̄umi Dio. “Cañuurije ȳu cátiere t̄uj̄uri, ‘Cañuu āmi,’ ȳure c̄u ī t̄uj̄uato Dio,” mani caīqūētie to c̄ānibato quena, “Cañuurā āma,” mani ī t̄uj̄umi Dio, c̄ūre mani caapija n̄cub̄ogoata. ⁶To bairona caī ucayupi Up̄au David tir̄m̄p̄u macac̄u: Dio camaja na cáti wamere t̄uj̄u t̄ugooñaqūc̄una, “Caroarā āma,” c̄u caī t̄uj̄urā macare war̄iñuuriquere na joogumi Dio. Oc̄o bairo caī ucayupi Up̄au David ānac̄u:

⁷Noa Diore c̄u na cabai netooriquere, caroorije na cátaje

Dio na c̄u camajiriobojaro bero caroaro war̄iñugarāma.

⁸Noa caroorije na cátaje Dio t̄ugooñaqūc̄una,

“Cañuurā āma, na ȳu popiyeyequetigu,” Dio c̄u caīrā

caroaro war̄iñugarāma, caī ucayupi Up̄au David ānac̄u.

⁹To bairi, “Judío maja, circuncisión cána jetore caroorije na cátiere na ȳu majiriobojaḡu,” īqūēmi Dio. Judío maja mee quenare, circuncisión cátiqūēna na c̄ānibato quena caroorije na cátaje na majiriobojami Dio. Abraham c̄u cabairiquere t̄ugooñaña tunu. Diore c̄u caapija n̄cub̄ogoro t̄uj̄uri, “Caroaro cácu āmi Abraham,” c̄u caī t̄uj̄yup̄ Dio. ¹⁰Ti wamere Abrah̄are c̄u cañ̄up̄ Dio circuncisión cátiqūēc̄u Abraham c̄u c̄ānop̄na mai. ¹¹To bairi Abraham circuncisión cátiqūēc̄u āc̄up̄ Diore caapija n̄cub̄ugo j̄ugoyup̄. To bairo Diore c̄u caapija n̄cub̄ogoro bero Dio circuncisión cáti rot̄iyup̄, “Ȳu yāu, cañuu ȳu caī t̄uj̄uu āmi,” īi. To bairi Abraham circuncisión c̄u cátiparo j̄ugoye mere, “Cañuu āmi Abraham,” Dio c̄u caī t̄uj̄yup̄. Noa to bairona Diore c̄u caapija n̄cub̄ogorāre, “Caroarā āma,” na ī t̄uj̄umi Dio. Abrah̄are, “Cañuu āmi,” c̄ūre c̄u caī t̄uj̄uricarore bairona na ī t̄uj̄umi Dio judío maja c̄āniqūēnare, circuncisión cátiqūēna na c̄ānibato quena. To bairi Abraham p̄āramerāre bairona ānaa baima c̄ūre bairona Diore caapijarā aniri. ¹²To bairona judío maja circuncisión cána na quena Abraham p̄āramerā āma Diore na caapija n̄cub̄ogoata. Mani ñic̄u Abraham circuncisión cátiqūēc̄u āc̄up̄na Diore c̄u caapija n̄cub̄ogoricarore bairona cána āma. Na quena Diore na caapija n̄cub̄ogoata Abraham p̄āramerāna āma.

La promesa se cumple por medio de la fe

¹³Tir̄m̄p̄ure Abrah̄are oc̄o bairo c̄u caī c̄ūñupi Dio: “Ati yepare m̄re, m̄ p̄āmerā quenare m̄jaare ȳu joogu.” Diore c̄u caapija n̄cub̄ogou c̄u c̄āno maca to bairo c̄u caī c̄ūñupi Dio Abrah̄are. Dio c̄u carotiriquere c̄u cátiē wapa mee c̄u caī c̄ūñupi Dio. ¹⁴“Dio Moisép̄ure c̄u carotiriquere caroaro cána mani c̄āno maca mani quenare Dio Abrah̄are c̄u caī c̄ūricarore bairona mani joogumi,” ī t̄ugooñabanama j̄icaarā Diore api n̄cub̄ogouquetibana quena. To bairo me ā na caī t̄ugooñarije. Dio c̄u carotiriquere cáti peorā jetore Dio Abrah̄are c̄u caī c̄ūrica wame unore c̄u cajoata jocarāna Jesu ye quetire mani api n̄cub̄ogoboricarā. To bairi Dio c̄u caī c̄ūrique caitorijere bairona aniboricaro Jesu ye queti.

¹⁵Dio Moisépüre cü carotiriquere mani áti peo majiqueti majuucõa. To bairi Dio cü carotiriquere camaja na cátiqüetie wapa na popiyeyegumi Dio. Cü carotirique camamata tiere cü carotiriquere cabai netoorã maniborãma.

¹⁶To bairi cüre caapiüja núcubugorã jetore Abrahãre cü caírca wame unore wariñuuriquere na joogumi Dio, na mai tujuri. Judío majare Moisé cü cáti rotirique cána quenare, tiere cátiqüena quenare wariñuuriquere na joogumi Dio Abrahãre bairona Diore caapiüja núcubugorã na cãmata. Cü ãnacure bairona Diore caapiüja núcubugorã mani cãnicõamata, “Abraham pãramerã majuuna ãma,” mani í tujumi Dio. ¹⁷Dio Abrahãre cü caí buioricarore bairona í ucarique ã Dio Wadarique cãniepu: “Capãarã maja ñicure mü yu cü,” í ucarique ã Abrahãre Dio cüre cü caí cürique. To bairo Abrahãre Dio cüre cü caí cürica wamere cü caapi núcubugoro maca mani ñicu cãnipaure cü cacüñupi Dio Abrahãre, Diore caapi núcubugorã ñicure. Dio maca ãmi cabai yajiricarãre catunu catio majii. Camanibataje quenare to cãno áti majimi. To bairi, “Seeto camajii aniri cü caírore bairona átiqumi Dio,” cü caí núcubugoyupu Abraham Diore.

¹⁸“Mü pãramerã capãarã majuu anigarãma,” Abrahãre Dio cü caíri paure Abraham capunaa mácu cãñupu mai. Capunaa mácu anibacu quena, “Dio yure cü caí cüri wamere bairona baigaro,” caí tugoofañupu Abraham.

¹⁹To bairo tugoofari cien cãnacã cüma cacugou anibacu quena, cü nũmo Sara quena seeto majuu cabucno, capunaa máco co cãnibato quena, “Capunaa mana já anicõagarã,” caíqüejupi. “Dio cü cabuiri wame cariape baigaro,” í tugoofari Diore caapiüja núcubugo janaqüejupu Abraham.

²⁰⁻²¹“Yure cü caí cürica wamere átiqüecumi Dio,” caí tugoofañqüejupu Abraham. “Yure cü caí cürica wame yu átiboja majiimi Dio, camaji netou aniri,” í tugoofañ netobujaro Diore caapiüja núcubugoyupu. ²²To bairo caroaro Diore cü caapiüja núcubugoro tujuu, “Cañuu, caroaro cácu ãmi Abraham,” cü caí tujuyupu Dio. To bairona í ucarique ã Dio Wadarique cãni pũuorpu.

²³Abraham jeto meere í uca buio majiorique cãñupa ti wame. ²⁴Mani quenare ati wamere mani camajiparore bairo í ucarique cãñupa. To bairi mani quena Diore mani caapi núcubugoro, “Cañuurã ãma naa,” mani í tujugumi Dio mani quenare. Diona ãmi mani Upau Jesure catunu catioricu, cabai yajiricu cü cãnibato quena. ²⁵Jesu maca caroorije mani cátie wapa mani cabai yajibojayupi. Cü cabai yajiro bero cü catunu catioyupi Dio Jesure. Jesure cü catunu catiorique jugori, “Cañuurã ãma,” mani í tujú majimi Dio manire.

El resultado de ser aceptados como justos

5¹Caroorije mani cátiere Jesucristo manire cü cawapayebajoaro maca, “Caroarã ãma,” mani í tujumi Dio. To bairo cü caí tujurã aniri caroaro mani ã Dio mena. ²To bairi Jesure mani caapiüja núcubugoro tujuu Dio maca mani mai tujumi. Mani mai tujuri cü yarã majuu caroaro cü mena macana manire cacüñupi. To bairi caroaro cü mena cãna aniri cü mena to cãnacã rümü caroaro mani cãnicõa aninucupere mani tugoofã wariñuu. ³To bairi capopiye tamõorã anibana quena mani tugoofã wariñuu. Ñuuqüetie tamõoriquire canucarã mani cãmata netobujaro Diore apiüja núcubugori, caroaro Dio yere tugoofarã mani bai. ⁴To bairo caroaro canucarã mani cãno tujuu Dio, “Caroaro cána muja ã,” manire ñimi. To bairo manire cü caíro caroaro manire cü cátiobjapere mani tugoofã

wariñuu. ⁵“Jocarã mee, manire átibojagumi Dio,” mani ī tũgooña maji. Dio cajooyupi cū Espiritu Santore mani mena cãcũre. To bairi cū Espiritu Santo mani mena cū cãno mani maji seeto Dio manire cū camairijere. To bairo caroaro manire cū camairijere majiri, “Jocũ mee ñimi Dio, caroaro mani átibojagumi,” mani ī maji yua.

⁶Dope bairo mani majuuna caroarã mani cãni majiquẽtore tũjuri caejayupi Cristo, manire bai yajibojau acũ. Mani cabai yajibojayupi cũre cabooquetana mani cãnibato quena. ⁷Jĩcaũ camajocũ cū yaũ cabai yajiboure cū maii, “Yũ mácana mũ yũ bai yajibojau,” ñi cũre cū cabai yajibojarique buiorica wame maa. To bairo to cãnibato quena jĩcaũ cabai yajibou caroau majuu cū cãmata apeĩ cū bai yajibojaboumi baii pũa. ⁸Cristo maca caroorije cãna mani cãnibato quena mani cabai yajibojayupi. To bairi, “Seeto mani maimi Dio,” mani ī maji cū Macũ manire cū cabai yajibojarotiriquere tũgooña majiri. ⁹Cristo manire cū carĩĩ re yajibojaro maca, “Caroarã ãma,” mani ī tũjumi Dio. To bairo manire ī tũjuri mani popiyeyequetigumi caroorã ya paũpũre. ¹⁰Diore cabooquẽna, cū wapanare bairo cãna mani cãnibato quena mani cabai yajibojayupi cū Macũ Jesucristo. Caroaro Dio mena, Dio yarã mani cãniparore bairo cabai yajiyupi Cristo. To bairo manire cū cabai yajibojarique jũgori Dio mena caroaro cãna mani ã. Cũ yarã majuu mani ã. To bairi Cristo bai yajicõari bero catunu catiyupi ñrã, “Manire popiyeyequetigumi Dio,” caroaro mani ī maji. ¹¹To bairi seeto majuu mani tũgooña wariñuu caroaro Dio mena mani cãniere. Mani Ƴpaũ Jesucristo jũgori caroaro Dio mena mani ã.

Adán y Cristo

¹²Adán caroorije cū cãtaje jũgori ati yepa macana camaja caroorije na cãtigarije cãni jũgoyupa. To bairi bai yajirique quena cãni jũgoyupa. To bairi mani camaja nipetirã caroorije cãna aniri cabai yajiparã mani ã. ¹³Dio cū carotirique Moiseĩpũre cū cacũparo jũgoye macanaru na quena to bairona caroorije cãna cãñuparã. Dio cū carotipere cacũquẽjupi mai. “To bairi yũ carotirique caapiĩjaquẽna ãma,” caĩquẽjupi Dio mai caroorije cãna na cãnibato quena. ¹⁴To bairona caroorije cãna cãñuparã ti yũtea macana. Adán bero Moiseĩ jũgoye macã yũtea macana quena to bairona caroorije cãna cãñuparã. Dio Adãre cū carotirica wamere Adán cũre cū cabai netoorica wame unore bairo cabai netoorã mee cãñuparã. Dio cū carotirique camañupe mai ti yũteare. To bairi dope bairo, “Yũ carotipere bai netooma,” na caĩ tũjũquẽjupi Dio. Caroorije majuu cãna cãñuparã paro. To bairi na nipetirã cabai yajiyuparã. To bairi Adán caroorijere áti jũgoũ caroorijere cacũñupi. Nemoona caroorijere cū cáti cũro bero cayoato beropũ cãñupũ apeĩ maca nemoona cañuurije jetore cácu. Cañuurije jetore cácu aniri caroa wame macare cacũñupi.

¹⁵Adán caroorije cū cacũriquere bairo me ã Cristo caroa wame macare manire cū cacũbojarique. Jĩcaũna Adán caroorijere cacũñupi. To bairo nemoona caroorijere cū cacũrije jũgori camaja nipetirã cabai yajiparã cãñupa. Dio maca manire mai tũjuri Jesucristo macare cajooyupi, cañuu netori wame manire átibojau, manire netoo catioũ. ¹⁶Adán caroorije cū cacũriquere bairo me ã Cristo caroa wame manire cū cacũbojarique maca. Adán caroorije cū cãtore tũjũũ, “Camaja nipetirã caroorije na cátie wapa popiye tamũogarãma,” cañũupi Dio. To bairo cū capopiyeyeparã na cãnibato quena na camaiñupi Dio. Na mairi, Jesucristore cajooyupi,

camajare na cū bai yajibojaato īi. To bairi caroorije mani cātie wapa Cristo manire cū cabai yajibojaro maca tiere majiriogumi Dio mani ye wapare. To bairo ácu, “Cañuurā āma,” mani ī tujugumi Dio, paio caroorije cána mani cānibato quena. ¹⁷To bairi jīcau Adán nemoona caroorije cū cáto mani camaja nipetirā cabai yajiparā mani ā. To bairo mani cānibato quena Dio maca caroaro mani mai tujumi. Mani mai tujuri caroorije mani cātiere majirio majimi Dio, Jesucristo jīcauna manire cū cabai yajibojarique jūgori. Caroorije mani cātiere majiriori, “Cañuurā āma,” mani ī tujugumi Dio. To bairi noa una nare cū camairijere caboorā caroa wariñuurique mena anicōa anigarāma Jesucristo mena. “Caroorije na cātiere na yu majiriobjagu,” cū cañrique caapi nūcubūgorāre to bairona caroa cānicōa aninucupere na joogumi Dio.

¹⁸Jīcau Adán caroorije cū cātaje jūgori camaja nipetirāre Dio na cū capopiyeyebope cāñupa caroorije na cātie wapa. Jesu maca caroa wame macare cū cātibojarique jūgori camaja nipetirā noa caboorā, “Caroorije yu cātiere yu majrioya,” Diore ī majima. To bairo na cañro Dio, “Cañuurā āma, yu mena caroaro anicōa anigarāma,” na īmi Dio. ¹⁹Adāre Dio cūre cū cañrica wamere cabai netoo nūcañupu Adán maca. To bairo cū cabai netoo nūcaro camaja nipetirā caroorije cána cāni jūgōyupa. Jesu maca Dio cūre cū cañrica wamere caapijuyupi. To bairo cū caapijuro camaja capārarā, “Cañuurā āma,” Dio cū cañ tujurā āma.

²⁰Moisēpūre cacūñupi Dio cū carotiriquere. Camaja nipetirā tiere tujū majiri, “Caroorā jā ā,” na majuuna na ī tujū majiatio īi cacūñupi Dio. To bairi camaja na majuuna caroorije na cātiere na camajiata netobujaro majigarāma nare Dio cū camai tujurijere. ²¹To bairi mani camaja nipetirā caroorije cána aniri cabai yajiparā mani ā. Dio maca mani mai tujuri mani Ūpau Jesucristore cajooyupi, “Cañuurā āma,” manire cū cañ tujuparore bairo. To bairo cū cañ tujurā aniri cū mena mani anicōa anigarā yua.

Muertos respecto al pecado pero vivos en Cristo

6 ¹“Caroorije cána mani cānibato quena Dio mani mai tujumi,” īrica wame caroaro mūjaare yu ī buio. To bairi, “Caroorije mani āti anicōato,” ī tūgoōñaqueticōaña. “Netobujaro mani mai tujugumi Dio caroorije netobujaro mani cāpata,” ī tūgoōñaqueticōaña. ²Caroorije cātīcōa aniparā mee mani ā, Cristo manire cū cabai yajibojaro maca. Jīcau ūcu cabai yajiricu ñeere āti majiquēemi. To bairo cū cāti majiquētoire bairona caroorijere cātīquetipe ā mani quenare. ³Mani cabautisa rotiwu, aperā, “Jesucristo yarā āma,” manire na cañ tujū majiparore bairo. Caroorije mani cātie wapa manire cabai yajibojayupi Jesu. To bairo cū cabai yajibojaricarā aniri cūre bairona mere cabai yajiricarāre bairona ānaa mani bai. Bautisa rotirā, “Jāana jā cabai yajiwu,” cairāre bairona ānaa mani bai. ⁴To bairi bautisa rotirā, Jesu rupau ānatore na cayaa rocaricarore bairona caroorije mani cāti ānajere cāti rericarā mani ā. Tiere cāti rericarā aniri caroorijere cāti janarā mani ā. Mani Pacu Dio caroaro cū cāti majirije mena Cristo cabai yajiricure cū catunu catioyupi Dio. To bairona Dio caroaro cū cāti tutuarije mena mani quena caroaro mani cātiparore bairo manire ātinemogumi Dio.

⁵Cristo yarā mani cāmata, “Jāana jā cabai yajiwu,” cairāre bairo mani bai, cū cabai yajibojaricarā aniri. To bairi mani quena cū catunu catirore bairona tunu catī tūgoōñarāre bairona mani bai. ⁶Cristo yucu

tëorica pãirp cûre papua jîrã manirena cãni jugorica yeri cañuuqueti yerirena ânare bairo ána cájupa. To bairona carotiyupi Dio caroorije mani cáti ʋjáaquetiparore bairo ïi. ⁷Jícau cabai yajiricũpna caroorijere áti majiquẽmi. ⁸To bairi Cristo manire cũ cabai yajibojarõ írã mani quena mere cabai yajiricarãre bairona cãna mani ã. To bairi Jesu bai yajiri bero catunu catiricũ cũ cãno maca, “Cũ mena caroaro cacati aniparã mani ã,” mani ï maji. ⁹Ocõo bairo quenare mani ï maji: Cristo bai yajiri bero, tunu catí, bai yaji nemoquetigumi. Catunu catiricũ aniri cabai yajinemopau me ámi. ¹⁰Jícanina cabai yajiyupi. To bairo baii manire cawapayeboja re peocõañupi caroorije mani cátiere. To bairi tunu catiipũ Dio cũ caboorijere cácu ámi yua. ¹¹To bairi, Jesucristo cũ cabairicarore bairona bairãna mani bai írã, ocõo bairo ï tũgoõñaña mũjaa: “Jesucristo manire cũ cabai yajibojaricarã aniri mani majuuna mere cabai yajiricarã cãnare bairona mani bai cãni jugorique cañuuqueti yericutaje. To bairi cabai yajiricũ cũ cáti majiquẽtore bairona mani quena caroorijere cáti ʋjáaquetiparã mani ã. To bairi catiipũ Dio cũ caboorijere macare cátiparã mani ã, Jesucristo yarã aniri,” ï tũgoõñaña mũjaa.

¹²To bairi yucuaçã cabai yajipa rupauricuna ãnapũ caroorije cáticõa aninucurã aniqueticõaña. To bairi caroorije mũja cátigabatiere átiquẽja. ¹³Caroorije cáticõa anigarã aniqueticõaña. Diore cabooquẽna na cayajiri paupũ mũja cãaãopere Dio cũ canetooricarã mũja ã. To bairi Dio cũ caboorijere jetore cáticõa aninucurã ãña. Cacatiri rupau mena catirãpũ to bairo jeto cañuurije áti anicõaña. ¹⁴Moisẽpũre Dio cũ carotiriquere cũ cacũrique mũjaare carotipa wame me ã. Dio maca mũjaare camai tũjuũ aniri mũjaare carotii ámi. To bairo cũ camai tũjurijere catũgoõñarã aniri caroorijere cáticõa aninucurã mũja aniquetigarã yua.

Un ejemplo tomado de la esclavitud

¹⁵To bairi Moisẽpũre Dio cũ carotiriquere catũgoõñarã mee mani ã. Dio manire cũ camai tũjurije macare catũgoõñarã mani ã. To bairi, “Baiyupa tũgoõña uwiricarõ mano caroorije mani áticõa aninucurã,” caí tũgoõñaquetipe ã manire. ¹⁶Nii caboure cũ cáti rotirijere átigarã, “Mũ paabojari maja já anigarã,” cũ mũja caĩro mũja ʋpau anicõagumi. Cũ caboorijere cána mũja anigarã. To bairi, “Caroorije cána mani anicõato,” mũja caĩata quena, “Tie caroorijere yũre carotiro to anicõato,” caĩrãre bairo mũja aniborã. To bairi caroorijere mũja áti jana majiquetiborã. To bairi Diore cabooquẽna na cayajiri paupũ cãaãaparã mũja aniborã. Dio macare mũja caapi nucũbugoata, “Caroarã áma, yũ yarã áma,” mũja ígumi. Mere tí wamere mũja maji. ¹⁷⁻¹⁸Tirũmũpũ caroorijere cáticõa ãna mũja cãnibajupa. Caroorije mũjaare to cáti rotirore bairona cána mũja cãñupa. Cabero caroa quetire aperã mũjaare na cabuorijere caroaro mũja caapi nucũbugoyupa. To bairi yucuaçã caroorijere cána mee mũja ã. Caroa macare Dio cũ caboorijere cána mũja ã. To bairo mũja cãniere tũgoõñari, “Nũu majuucõa na mũ cáti,” Diore cũ yũ ï wariĩuu. ¹⁹Caroaro mũja caapi majiparore bairo mũjaare yũ ï buio majio ati wamere paabojari majocu cũ caupau cutiere. Tirũmũpũre, “Caroorije cána mani anicõato,” mũja caĩñupa caroorije jetore áti ãnapũ. Yucũra, “Cañuurije macare cána mani anigarã,” ïña mũjaa, cañuurã, Dio yarã, cũ caboorijere macare cána anigarã.

²⁰Tirũmũpũ caroorijere jetore cátigarã aniri caroa macare mũja cáti majiquẽjupa. ²¹Tirũmũpũ caroorijere cána ãnapũ ñe unie caroa

wariñuuriquere muja bugaquetana. Yucuaacã caroorije tirumuru muja cátibatajere tugooñarã muja bobo tugooñanucu. To bairo muja cáticõa ânato bero to cãmata Diore cabooquẽna na cabai yajiri paupu muja aãborã. ²²To bairi caroorije Satanã cu cáti rotirijere cáti majiparã mee mani ã, tiere Cristo maca manire cu cawapaye rebojaro. Dio cu caboorije jeto cátiparã muja ã yucura. To bairi cu caboorije cána aniri cañuurije majuure muja buganucu: “Cañuurã ãma,” mujaare cu cañijere, cu mena to cãnacã rumu cacaticõa aninucupere muja buga. ²³Caroorije átaje maca yajirique jeto wapa joo. To bairo to cãnibato quena mani Upau Jesucristore mani caapi nucubugoata Dio maca to cãnacã rumu cacaticõa aninucupere manire joogumi wapa manona.

Un ejemplo tomado del matrimonio

7 ¹Yu yarã, Moisépure Dio cu carotiriquere camajirã muja ã. Noo cãcu cu cacatiri rumu cõo tiere cátipau ãmi. Cu cabai yajiro bero dope bairo cõre áti roti majiña mano tie. Mere muja maji. ²Ocõo bairo i Dio cu carotirique: Jícao cãromio co manapu cu cacatiro cõo cu mena jeto co ãmaro. Co manapu cu cabai yajiata Dio cu carotiriquere cabai netoo me ãmo apeĩ macare tunu co camanapu cõpata. ³To bairi co manapu cu cacatirona apeĩ mena co cãmata cáti epeo anibomo. Cu cabai yajiro bero maca apeĩ macare co camanapu cõpata Dio cu carotiriquere cabai netoo aniquetibomo. Camanapu bai yaji weorico aniri cáti epeo me ãmo apeĩ co camanapu cõpata tunu.

⁴To bairona ã, yu yarã, Dio cu carotiriquere mani cabairije. Cristo manire cu cabai yajibojaro manina cabai yajiricarãre bairona mani ã. To bairi, “Tie Moisépure Dio cu carotirique manire carotipa wame me ã yucura,” mani i maji. “Dio cu carotiriquere cána mani cãno cu mena mani cãnicõa aninucupere mani joogumi Dio,” írca wame mani iquere yucura. Jesu cu cabai yajibojaricarã aniri cu yarã majuu mani ã yua. Bai yajibacu quena catunu catiyupi Jesucristo. To bairi Jesu catunu catiricu yarã aniri Dio cu caboorijere cátiparã mani ã yucura. ⁵Cajugoyeru mani majuuna mani caboorije cáti ãna ãnapu Dio cu carotiriquere mani cátigaquetinucu. To bairi Dio cu carotiriquere api majirãpu caroorije majuu mani cátiga aninucurijere mani camajiwu. To bairi Dio cu carotiriquere átiquetibana caroorije netobujaro cátingarã mani cãmu. To bairo mani cãnaje wapa caroorã na ya paupu cayajiparã mani cãnibajupa. ⁶Yucura Moisépure Dio cu carotiriquere catugooñaparã mee mani ã. Tie mani cáti ocabutiquẽtie wapana manire cabai yajibojayupi Jesu. To bairi cu cabai yajibojaricarã aniri manina cabai yajiricarãre bairona cabairã mani ã. To bairi Moisépure Dio cu carotirique manire carotipa wame me ã yucura. “Tiere cãno cõo yu átigu, cañuu anigu,” mani i majiquẽe. Yucura Dio Espiritu Santo mani mena aniri cawama yericuna maca mani cãno áami Dio. To bairo cu cáto cañuurijere Dio cu caboorijere cátiparã mani ã yucura.

El pecado que está en mí

⁷To bairi, “Moisépure Dio cu carotirique ñuuquẽe,” caĩ tugooñaqueticõape ã manire. Cu carotiriquere cacũñupi Dio, “Caroorije ã tie mani cátie,” mani caĩ majiparore bairo ii. Cu carotirique to camamata, “Tie ã caroorije mani cátie,” mani i majiquestiboricarã. Ocõo

bairo carotiyupi Dio Moisépure: “Apeĩ cü yere tujü ugooqueticõaña.” To bairo cü caiquêpata, “Apeĩ cü cacügorije tujü ugoorique caroorije äno,” yu ĩ majiquetiboricu. ⁸To bairi tie Dio cü carotiriquere majii, “Seeto rooro aperã yere caboo tujüu yu ã,” yu caĩ majiwu yua. Ti wame Dio cü carotiriquere yu camajiquêpata, “Ti wamere caroorije cácu yu ã,” yu ĩ majiquetiboricu. To bairo majibacu quena netobujaro aperã yere yu catujü ugoowu. ⁹Dio cü carotiriquere caroaro yu camajiparo jügoye, “Caroaro cácu yu ã,” yu caĩ tugoõñabapü mai. Dio cü carotiriquere majiri, “Caroorije macare cácu yu ãñupa,” yu caĩ majiwu. Tere majiri, “Caroorã na cabai yajiri paupü cáárapu yu ã,” yu caĩ tugoõñarique pai jutiritiwu yua. ¹⁰Camaja Dio cü carotiriquere na caapijuaata caroaro majuu aniboricarãma. Yuã Dio cü carotiriquere majiri yu catugoõñarique pai jutiritiwu, “Tiere áti ocabuti majiquetibacu cayajipau yu ã,” ĩ majiri. ¹¹To bairi jocuna, “Caroaro cácu yu ã,” yu caĩ tugoõñabajupa. Dio cü carotiriquere majiipi, “Tiere cátigaquêcu yu ãñupa,” yu caĩ majiwu, caroorije maca yu cátajere majiri. To bairi, “Caroorã na cabai yajiri paupü cáárapu yu ã,” yu caĩ majiwu yua.

¹²To bairi Moisépure Dio cü carotirique caroa macaje jeto ã. Cariape ĩ cü carotirica wame. ¹³To bairi tie cañuurije to cãnibato quena, “Yure cayajiro áa,” caĩ tugoõñaquetipe ã. Mani majuuna caroorije cáтана aniri cabai yajiparã mani ã. Cañuurijere Dio cü carotiriquere camajirã aniri dije caroori wamere mani cápata, “Caroorije yu áa, Dio cü carotiriquere cátiquêcu yu ã,” mani ĩ maji. To bairi caroorã mani cãniere majiri, tie wapa mani cayajipe quenare mani maji. To bairi Dio cü rotiriquere cacũñupi, “Yu carotiri wamere na cátiquêtie caroorije majuu ã,” na ĩ majiatio ĩi.

¹⁴“Diona cü carotiriquere Moisépure cü cacũñupi,” mani ĩ maji. Yu maca camajocu, caroorije cácu yu ã. To bairi caroorije jeto yu áti aninucu. ¹⁵Caroa yu cátigabatiere yu átiquetinucu. Yu cátigaquêtie macare yu áa. Nope ĩi to bairo yu ácu, yu ĩ majiquê. ¹⁶To bairi caroorije átigaquetibacu quena caroorije yu áa. To bairo átibacu, “Dio cü carotirique cañuurije majuu ã,” yu ĩ maji. ¹⁷To bairi caroorije yu cátie yu majuuna yu cátigarije me ã. Yu yeripü caroorije cátigarije anicõari caroorije yu cáto roque áa tie majuuna. ¹⁸“Yuã camajocu ati yepa macacu aniri yu yeripü caroorije cátigarije jeto anicõa,” yu ĩ maji. Caroare átigabacu quena yu áti ocabuti majiquê. ¹⁹To bairi caroa yu cátigabatiere yu átiquê. Cañuuquêtie yu cátigaquetibatie macare yu áa. ²⁰To bairi caroorije yu cátigaquetibatiere ácu yu majuuna yu átiquê tie caroorijere. Yu yeripü caroorije cátigarije anicõari caroorije yu cáto áa tie majuuna.

²¹To bairo jeto yu bainucu. Yu yeripü caroorije yu cátigarije to bairona anicõa. To bairi cañuurije yu cátigarije to cãnibato quena dope bairo áti majiña maa. ²²Yu tugoõñariquepure, “Dio cü carotirique seeto yu átigacupü,” yu ĩnucubapa. ²³To bairo yu cañnucubato quena yu yeripü caroorije cátigarije anicõari yure mata caroa macare yu cátibopere. Yu catugoõñarijepü caroare átigabacu quena yu rupau maca caroorijere yure áti roti. To bairi caroorijere yu áti jana majiquê.

²⁴Caroorije áti jana majiquetibacu seeto yu tugoõñarique pai. To bairo caroorije cáti rupaure carupaucucu aniri caroorã ya paupü cáárapu yu anibou. ¡Aagu! Caroorã ya paupü cááabopau yu cãnibato quena yucura yu yeripü caroorije cátigarije cãniere yure netoobojagumi Jesucristo. Cuna

ãmi caroorã ya paupũ yũ cabai yaji aábopere yure canetoobojaũ. ²⁵Mani Upaũ Jesucristona ãmi, yure canetoobojaũ. To bairi Diore, “Nuu majuuçõa,” cũ yũ ï. To bairi yũ majuuna yũ catũgoonarijepũ seeto Dio cũ carotirijere yũ átigacupũ. To bairo baibacũ quena caroorije cáti rupaure carupaucũcũ aniri caroorije yũ yeripũ cátigarijere cácu yũ anicõa.

La vida que es por el Espíritu de Dios

8 ¹To bairi, “Caroorã ãma, caroorije na cátie wapa na yũ popiyeyegũ,” iquẽemi Dio cũ Macũ Jesucristo yarãre. Cũ yarã aniri mani majuuna caroorije mani yeripũ mani cátigarijere áticõa aniquẽe. Dio Espiritu Santo cũ caboorije macare mani áticõa aninucu. ²To bairi Jesucristo yaũ yũ cãno Dio Espiritu Santo caroa yũ cáti aniparore bairo maca yure áami. To bairo yure cũ cáto caroorijere yũ áticõa aninucu majiquẽe. To bairi caroorã na cabai yajiro na ya paupũ yũ aáquetigũ, to bairo yure cũ cáti bojaro maca. ³Mani majuuna cañuurã mani ani majiquẽe, Moisépũre Dio cũ carotiriquere cáti peo majiquẽna aniri. To bairo mani cabairijere tũjuri Dio cajooyupi cũ Macũre caroorije mani cátiere cawapayebopapũre. Cañuurã, cũ yarã mani cãniparore bairo ïi cũ cajooyupi cũ Macũre. Mani camaja caroorije cána rupaure bairona carupaucũcũ cãñupi Dio Macũ Jesu. To bairi manire bai yajibojaũ, caroorije mani yeripũ cãniere cawapaye re peocõañupi. ⁴To bairo mani cáti bojayupi Dio, Espiritu Santo cũ cáti tutuarijere mena cũ carotirique caĩri wamerena caroaro caroare mani cáti ocabũti majiparore bairo ïi. To bairi mani majuuna caroorije mani yeripũ cátigarijere mani áticõa aniquẽe. Dio Espiritu Santo cũ caboorije macare mani áticõa aninucu.

⁵Noa na majuuna caroorije na cátigarijere cátinucurã na yeripũ caroorije na cátigancurijere jetore catũgoonacõa ãna ãnama. Apeřã maca Dio Espiritu Santo cũ caboorije macare cáticõa ãna Dio Espiritu Santo cũ cãniere catũgoonacõa ãna ãnama. ⁶Caroaro anigarãma. To bairo quena to cãnacã rũmũ Dio mena anicõa aninucugarãma. Apeřã maca na majuuna caroorije na cátigarijere catũgoonãrã maca caroorã na cãni paupũ aágarãma bai yajirãpũ. ⁷Na majuuna caroorije na cátigarijere catũgoonãrã Diore cateerã ãma. Dio cũ carotirijere apigaquẽema. To bairi dope bairo áti majiquẽema cũ carotirijere. ⁸Dio cũ catũjũ wariñuurijere áti majiquẽema, to bairo na majuuna caroorije na cátigarijere catũgoonãrã aniri.

⁹Mũja maca Dio Espiritu Santore cacũgorã aniri cũ caboorijere cána mũja ã. Mũja majuuna caroorijere mũja cátigarijere catũgoonãrã mee mũja ã. Noa Dio Espiritu Santore cacũgoquẽna maca Cristo yarã me ãma. ¹⁰Mũja maca cũ yarã mũja ã. To bairi mũjaapũre ãcũmi Cristo. To bairi Dio, “Cañuurã ãma,” mũja ï tũjũmi mũja quenare. To bairo cũ caĩ tũjurã aniri mũja yeri to cãnacã rũmũ cũ mena caroaro cãnicõa aniparã mũja ã, caroorije mũja cátibata rupaũ cayajicoatie to cãnibato quena. ¹¹Cristo cũ cabai yajiro bero cũ catunu catioyupi Dio Cristore. To bairi mũja quenare mũja rupaũ to cabai yajibato quena tunu catiogũmi Dio cũ Espiritu Santo jũgori. Mũja quena Espiritu Santore cacũgorã mũja cãno to bairo mũja átigũmi Dio.

¹²Yũ yarã, Espiritu Santore cacũgorã aniri mani majuuna caroorije mani cátiga tũgoonarijere cáti aniquetiparã mani ã. ¹³To bairona cána mani cãmata Diore cabooquẽna na ya paupũ cayajiparã mani aniborã. Mani rupaũ mena caroorije mani cátigarijere carerã mani ã Espiritu Santo

jugori. To bairo cū jugori caroerijere mani cáti janaata to cānacā rumu Dio mena caroaro cānicōa āna mani anigarā.

¹⁴Noa Espiritu Santore cáti ũjarā una Dio punaa ānaa baima. ¹⁵Dio cū Espiritu Santo manire jou, “Yū punaa āma,” mani caī cūñupi manire. Paari maja na ũpaure na cauwi tūgoōñarore bairona cūre cabaiparā meere mani cacūñupi Dio, cū Espiritu Santo manire jou. Cajūgoyepu Dio cū carotiriquere áti peo ocabūtiquetibana mani cauwiwu. Yucura mani uwiqūē, cū punaa aniri. To bairi Espiritu Santo mani mena cū cāniere tūgoōñarā, cū punaa aniri, “Caacu,” cūre mani ī, Diore jenirā. ¹⁶Dio Espiritu Santo jugori mani maji Dio punaa mani cāniere. “To bairi Dio punaana mani ā,” mani caī tūgoōña majipere mani joomi Dio Espiritu Santo. ¹⁷To bairi Dio Macu Cristo caroare cū cacūgorore bairona mani joogumi Dio mani quenare. Dio punaana aniri cū ye caroare cacūgoparā mani ā. To bairi Cristo yere āna mani catamuoata quena, cūre bairona caroaro majuu cāni wariñuurā mani anigarā.

La gloria que ha de venir

¹⁸Ati rumuri ati yepapu ānaa mani popiye tamuobuja. Aperā Jesure mani caapijaro booquēna mani popiyeyema. Cabero ape rumupu caroaro cāni wariñuurā mani anigarā. To bairi yucu mani catamuoerije to cānibato quena mani tūgoōñaquēna, cabero mani cāni wariñuu netope macare tūgoōñari. ¹⁹To bairi ti rapu mani Dio punaa caroaro majuu cāni wariñuurā mani anigarā Dio mena. To bairo cabairi rapu nipetirije Dio cū cáti jeñoorique cawama jeto wajoagaro. Nipetirije Dio cū cátaje, nipetirā cū cáтана quena seeto caroaro cawajoarā anigarāma. ²⁰Nemoopure Dio caroa cū cáti jeño jugórique cañuurije jeto cānibajupa. Cañuubataje to cānibato quena cañuuquētie maca to āmaro írícumi Dio. Tie majuuna cabaiquējupa. Adán maca caroerije cū cáti jugó rooye tuuro, “To cōona yu cáti jeño jugóbataje caboape to anicōato,” írícumi Dio. Ape rumupu apeye cawama macare jeñoogu, caboa rotiyupi Dio. ²¹To bairi atie Dio cū cáti jeño jugorique caboa repe ā. To bairo cabairije to cānibato quena cabero nipetirije cū cajeñoorique caroa jeto wajoagumi. Mani cū punaare caroa rupaucuna mani cāniparore bairo manire cū cawajoari rapna to bairona caroa jeto átigumi Dio tunu.

²²“Ati ũmurecoo macaje catamuoerije jeto ā,” mani ī maji. Nipetiro Dio cū cáti jeñooricarā, cū cajeñoorique catamuoerā, catamuoerije jeto aninucu mai. ²³Mani quena carupaucuna aniri catamuoerā mani aninucu. Catamuoerā anibana quena, “Caberopu ani wariñuurique jeto anigarō,” mani ī maji, Espiritu Santore cacūgorā aniri. To bairi Dio punaa aniri caroaro cū mena to cānacā rumu mani cānicōa anipere mani tūgoōña wariñuunucu. Cawama rupau cariaqueti rupau manire cū cajoopere quenare mani tūgoōña wariñuunucu. ²⁴To bairona manire cū cacatiopere, cū mena caroaro mani cānipere tūgoōñari Diore mani caapija jugówu. To bairi, “Caberopu cawama rupaucuna caroaro cāni wariñuurā mani anigarā,” írica wamere apiri tiere manire cū cajoopere mani tūgoōña wariñuu yuu. Manire cū cajoogari pau caejaro to cōona mani yuu janagarā. Jícau mere cūgoupu to cōona tiere tūgoōña yuu janaumi, mere cacūgou aniri. ²⁵Mai Dio manire cū cajoopere tūjuquetibana quena tūgoōña patowācaquēnana mani yuu.

²⁶To bairi Espiritu Santo manire átinemomi, caroaro cáti majiquēna mani cāno maca. Mani majuuna dope bairo Diore mani jeni nucūbugo

majiquêe. Cũre mani cajenipa wame quenare mani majiquêe. To bairi caroaro camajiquêna mani cãno Espíritu Santo maca caroaro tutuaro Diore mani jenibojami. ²⁷Mani Jesu yarãre manire jenibojami Espíritu Santo Dio cu caboorore bairona. To bairo Espíritu Santo manire cu cajenibojaro caroaro api majimi Dio, mani yeri catũgooñarijere catũju majii aniri.

Más que victoriosos

²⁸Manire cacũñupi Dio cu yarãre, cu caboorijere na átinucu anicõato ñi. To bairo manire cacũricu aniri nipetiro mani cabairijere caroaro áami Dio, netobũjaro cañuurã na ãmaro ñi. Cũre camairã mani cãno maca to bairona áami mani cabairijere. Ti wamere caroaro mani maji. ²⁹Nemoopũna cu yarã cãniparãre mani camaji juũgoyeyupi Dio. Mani maji juũgoyeyeri cu Macũre bairona cãniparãre mani cacũñupi Dio. To bairi Dio punaare manire cãni juũgoũ ãmi Dio Macu Jesu. ³⁰Cajuũgoyepũ cu yarã cãniparã cu cacũricarãre mani capiyupi, cũre caapiũjarã mani cãniparore bairo ñi. To bairi, “Cañuurã ãma,” mani caĩ tũjuyupi cũre caapiũjarãre. To bairo mani ñ tũjuũ, “Cũre bairo caroarã, cabero cu tũpũ cãni wariñuũparãre mani cacũñupi Dio maca yua.”

³¹To bairi tie caroa wame majuure majiri ocõo bairo quenare mani ñ maji: “Dio yarã, cu camai tũjurã mani cãno aperã noa una manire catũjuteerã mani rooye tuu majiquênama.” ³²Dio cajooyupi cu Macu jĩcaurena Jesucristore manire cabai yajibojapaurẽ. “Cu yũ maibũja yũ Macũre, to bairi cu yũ jooquetigũ,” caĩquẽjupi Dio. To bairi cu Macũrena cajooricu aniri ape wame quenare mani catũgooñari wame cõona nipetirije caroare mani joogumi Jesucristo juũgori. ³³To bairi cu cabejericarã mani cãno, “Cañuurã ãma,” mani ñ tũjuũmi Dio. To bairo Diona manire cu caĩ tũjurã mani cãno noa una aperã, “Cañuuquẽna ãma, nare carepe ã,” manire ñ wada pai majiquênama. ³⁴Jesucristo mani ye wapa manire cabai yajibojayupi. Cabai yajiricu anibacu quena tunu catĩ, Dio tũna ruiimi. Topũna ruiiri Diore manire jenibojau ãcũmi. To bairi aperã maca manire, “Caroorã ãma, na ye wapa na capopiyeyepẽ ã,” mani ñ wada pai majiquênama. ³⁵Noa manire Cristo cu camaiquẽto roque áti majiquênama. Mani catamũobato quena, mani catũgooñarique pai uwibato quena, aperã rooro manire na cátibato quena, uũgarique camanibato quena, cabopacarã mani cãnibato quena, cauwiõrije to cãnibato quena, aperã manire na cajĩagabato quena, “Mani mai janaquẽemi Cristo,” mani ñ maji. ³⁶Ocõo bairo ñ ucarique ã Dio Wadariquepũ:

Mũre caapiũjarã jã cãno maca aperã mũre cabooquẽna maca jãre jĩaganucuma. Oveja na caĩrã waibũcurã nuricarãre camaja na cajĩa uũgaga tũju uũjarore bairona jãre áama, jãre jĩagarã, ñ ucarique ã.

³⁷To bairi to cãnacã wame rooro tamũobana quena Diore apiũja janaquetiri mani mũca ocabũti maji, Jesucristo manire cámaĩi manire cu cátinemoro maca. ³⁸⁻³⁹Seeto mani maimi Dio, Jesucristo yarã mani cãno. To bairi dije Dio manire cu camaiquẽto maca cátipa wame máni majuucoã. “Cariape ã tie,” yũ ñ maji. To bairi mani cabai yajiata quena, mani cacatiata quena Dio mani mai janaquetigũmi. Dio tũ macana ángel maja quena, wãtia quena, maca uũparã quena Dio manire cu camai janaro áti majiquẽema. Yũcũacã cabairi wame, caberopũ cabaipa wame quena, Dio manire cu camai janaro cátipa wame maa. Jõ bui macana, ati yepa õoro macana quena Diore manire cu mai jana roti majiquẽema. Dije majuu Dio

cú cáti jeñoorique manire cú camai janaro cátipa wame máni majuucõa. To bairi mani mai janaqueti majuucõagumi Dio yua.

Dios ha escogido a los de Israel

9¹⁻³ Yú yarã judío maja na cãniere seeto majuu yú yeri tugooñarique pai. Jesucristore na canucubugoquétie wapa na popiyeyegumi Dio.

To bairi Jesucristore na canucubugopere bou yú macare Dio cú rocacõato yú íboñ. To bairi Dio nare cú popiyeyequeticõato íi na wapyeyojaure bairo yú átigabapa. Cristo mena macacu yú aniquetibou, na maca Cristo mena macana na anicõato íi. Jesucristore caapiujau yú cãno Espiritu Santo yú catugooñarijere carotii ámi. To bairi cariape mujaare yú í buio yú catugooñari wamere. ⁴Tirumuru macacu Jacobo cawamesucu cabero Israel cawame wajoaricu páramerã já á judío maja. Yú punaa na ámaro íi na cabejebajupi Dio já ñicu jáare Israel majare. To bairi na mena cãñupi. Na mena ácuru caroaro cú cãniere na caiñoõnupi. Cú caí cùriquere na buio majori camajare na cú cátiobjapere na cai buioyupi Dio Israel majare. Cú carotiriquere na cacũñupi. Cũre na cáti nucubugopa wii quenare cacugoyupa. “Caroaro na yú átiobjagu muja páramerãre,” na caí buioyupi Dio. ⁵Jã judío maja Jacobo punaa nemoo cãni jugoricarã doce cãnacãna na páramerã já á. Cristo quena ti poa macacuna cabuiayupi camajocu anigu. Cristo ámi Diona ati umurecoo nipetirijere caroti netou. To bairi cũre mani áti nucubugocã aninucugarã. Amén.

⁶Dio judío majare caroa macajere na cú cátiobjabato quena capãarã cú áti nucubugoquẽema. Na canucubugoquẽto, “Judío majare caroaro na yú átiobjagu,” Dio nare cú caibataje baiquetigaro íi mee yú í. Ocõo bairo maca ã: Jicaarã jeto judío maja Dio punaa majuu áma. “Israel páramerã aniri nipetirã Dio yarã majuu áma,” írca wame maa. ⁷To bairona, “Abraham páramerã aniri cú ánacure bairona Dio yarã áma nipetirã,” írca wame maa. Ocõo bairo caĩñupi Dio Abrahãre: “Isaá páramerã cãni bui pearã jeto, ‘Yú páramerã majuu áma,’ mu cairã anigarãma.” ⁸Ocõo bairo ígaro íi: “Abraham ya poa macana cabui pea ɲjarã na cãno maca yú punaa áma,” na í tujquẽemi Dio. Dio, “Caroaro camajare na yú átiobjagu,” cú caí cùriquere caapi nucubugorã maca Dio punaa majuu áma naa. ⁹Ocõo bairo caĩñupi Dio Abrahãre: “To cõoru yú atígu,’ yú cairi paɲ caejaro yú atígu. To cõoru yú cáatõ mu numo Sara macu cutigomo.” To bairona caí cũñupi Dio Abrahãre cú macu Isaá cú cabuiapere yua.

¹⁰Cabero já ñicu Isaá numo Rebeca jicanina punaa cutio pugarã cacugoyupo. Jicaɲ punaa, Isaá punaa jeto cãñuparã. ¹¹⁻¹³Na cabuiaparo jugoyepuna caroaro o rooro na cátiquetibato quena Dio cabeje jugoyeyeyuru jicaure. Cú beje jugoyeyei, ocõo bairo na paco Rebecare co caĩñupu Dio: “Cajugocu maca cú baire capaabojaɲ anígumi.” Cú caboore bairona cabejei aniri to bairona caĩñupi Dio na paco Rebecare. To bairi camaja mani cátiere tujɲ cõoñaquẽcuna noa cú caboorãre mani beje cúumi Dio cú yarã cãniparãre. Atie Dio ye queti ucarica pũuropu to cairore bairona ã: “Jacobore cú yú mai netowu. Esaú macare cú yú maiquẽru,” caĩñupi Dio. To bairi Dio cú caboore bairo na cabejeyupi, na cátaje wapa meere.

¹⁴To roquere, “Dio na cátiobjiquere tujɲ cõoñaquetibacu quena jicaure cú mai netori cariape átiquẽemi Dio,” í tugooñaqueticõaña. ¹⁵Cajugoyepu Moisé tirumuru macacure: “Noa yú caboorã jettore na yú bopaca tujugɲ,” cú

caĩñupi Dio. ¹⁶To bairi Dio cū majuuna manire cū cabopaca tujuro caroaro áami manire. Caroaro manire cū cátibojapere mani cabooro o caroaro mani majuuna mani cáti tutuarije wapa mee manire átibojami. ¹⁷To bairi Dio cū majuuna cū cabooro cájupi Ejipto macana upaure tirumuru macacu Faraõ cawamesucure. Ocõo bairo ĩ ucarique ã Faraõ cawamesucure Dio ye queti ucarica pũuropũ: “Mũre upau yũ cajõowũ, mũ jugori yũ catutuarijere yũ áti iĩoogũ ĩi. Ati yepa macana nipetirã yũ ye queti na majiatio ĩi, upaure mũ yũ cajõowũ,” ĩ ucarique ã Faraõ cū cãnjere. ¹⁸To bairi Dio noa cū camai tujugarãre na mai tujũmi. Cũ re canucubogateerã quenare cũre na cabai netoo nũcaro na áami. Cũ cabooro na átinucumi camajare.

¹⁹To bairo caĩrije apirã ocõo bairo mũja ĩ tũgoõaborã: “Dio cū majuuna cū cabooro mani yerire cácu aniri, ‘Rooro áama, cabai buicũna áma,’ manire cū caĩquetipe anibapa. Mani yeripure cū cátigari wamere mani majuuna mani mata majiquẽe. Mani cãnipere mani camata majiquẽto maca, ‘Cabai buicũna áma,’ manire cū caĩquetipe anibapa,” mũja ĩ tũgoõaborã.

²⁰To bairo me ã. Cawatoa cãna anibana quena cãni majuure Diorena, “Cariape mũ átiqũee,” cũre mũja ĩ tuti majiqueti majucõa Diore. Jotu caweore, “To bairi jotũ yũ wequeticõaña,” ĩ tuti majiquẽto jotũ quena. ²¹Rĩi weri majoco noo co cabooro jeto we majimo. Jĩca buruarena noo jĩca rũ cawatoa cãnipa rũ co cabooro co cacũgopa rũ we majimo. Ti buruarena ape rũ caroa rũ boje rũmũ cãno co cacũgopa rũ quenare co cabooro we majimo. Co cabooro co cátoare bairona manire áami Dio quena cū caboorijere.

²²To bairi Dio cū catutuarijere iĩou camajare na cū capopiyeyepere capopiyeyegaquẽjupũ rooro na cátibato quena. Nemoona cariape na popiyeyeboricũmi Dio. ²³To bairona na canũcaĩrupũ Dio, camajare na yũ catũju bopacarijere na majiatio ĩi. Tirumuru mani cabejeyupi Dio cū catutuarijere na cū caĩñooparãre, caroaro cū cátibojaparãre. ²⁴To bairi manire bejei jĩcaarã judío majare jã cabejeyupi. Aperã judío maja cãniquẽnare jĩcaarãre cabejeyupi mũja quenare. ²⁵Judío maja cãniquẽna jĩcaarãre Dio na cū cabejeyepere Dio ye quetire ocõo bairo caĩ ucayupi Osea cawamesucũ tirumuru macacu cãniñaricũ:

Yũ yarã cãniquetana macare, “Yũ yarã,” na yũ ĩgũ.

Yũ camaiquetana macare, “Yũ camairã mũja ã,” na yũ ĩgũ.

²⁶“Dio yarã me áma,” caĩricarã macare, “Dio to cãnacã rũmũ cácu yarã, cū punaa áma,” ĩrique anigaro, caĩ ucayupi Osea tirumuru macacu Dio ye quetire ucau.

²⁷⁻²⁸Judío maja na ye cãnipe macare ocõo bairo caĩ ucayupi Isaía:

Dio na popiyeyegũmi ati yepa macanare. Dio tirumuru cū caĩricarore bairona, cū caĩ buioricaro cõona cariapena uwaro mena na popiyeyegũmi ati yepa macanare. To bairi Israel maja capãarã majuu anibana quena jĩcaarãcã jetona netogarãma nare Dio cū capopiyeyepere, caĩ ucayupi Isaía.

²⁹Cũa Isaíana apeye cauca jũgoyeyeyupi tunu:

Mani upau Jeová nipetirãre carotii jĩcaarãre Israel pãramerãre cū canetooquẽpata mani judío maja mani yaji petiboricarã. Tirumuru macana Sodoma, Gomora macanare na cū capopiyeyero na cayaji petiricarore bairona mani yaji petiboricarã.

Los judíos y el evangelio

³⁰Ocõo bairo mũjaare yũ buionemoguũ tunu: Judío maja cãniquẽna maca, “Caroarã áma,” Dio nare cū caĩ tujupere catũgoõañaquẽjupa. Caroare na

cáti ocabütiquetibato quena, “Caroarã äma,” na ïmi Dio Jesucristore na caapi núcubugoata. ³¹ Judío maja maca, “Moisépure Dio cü carotiriquere äna caroarã Dio mena mani anigarã,” caí tugoõñare núcubajupa. To bairo tugoõñabana quena nipetirije Dio cü carotiriquere cáti peo majiquējupa. To bairi, “Caroarã äma,” na caí tujü wariñuuquējupi Dio. ³² Dio, “Caroarã äma,” nare cü caí tujü wariñuuquetajere tugoõñari ocõo bairo mani ï maji: Na majuuna na catugoõña tutuarije mena caroare átigabana Jesucristo ye queti macare caapi núcubugoquējupa. To bairi Cristore na caapi núcubugoquētie jügori Û taapure capuga ta ña roca cumurãre bairona baima. Jesucristore api núcubugoquetibana cüre camajiquēna äma.

³³ Tiere ocõo bairo caí ucayupi Isaíá tirumũpũ macacũ Dio Wadariquepũre: Jerusalẽpũ joogumi Dio jĩcaũ caroaũ majuu cü cabejeire.

Cüre cü cajoobato quena cü tujü teegarãma to macana, cü tujü núcubugoquetiri. Jĩcaarã Jesucristore canúcubugorã maca wariñuurique bugagarãma. “Jocuna cü yũ caapi núcubugobajupa,” ï tugoõñarique paiquetigarãma, ïrica wame caí ucayupi Isaíá tirumũpũre.

10 ¹ Yũ yarã, Israel majare Dio na cü capopiyeyepe nare cü canetooro seeto yũ boo. To bairi nare cü netooato ï yũ yeripũ tugoõñari nare yũ jeniboja Diore. ² Na cãniere ocõo bairo äama: Dio cü caboorijere átigabana quena cü caboorije majuu cariape api majiquēma. ³ To bairi Jesucristore na caapi núcubugoata, “Caroarã äma,” na ï tujũboumi Dio. Ti wamere api majiquēma. Ti wamere api majiquetibana, “Mani majuuna tugoõña ocabütiri caroa jeto mani áti ocabütigarã. To bairo mani majuuna caroare mani cáti ocabütiro tujũũ, ‘Caroarã äma,’ mani igumi Dio,” ï tugoõñabana. To bairo ï tugoõñabana quena Dio cü caboorije majuure cabai netoorã äma. To bairo cabairã na cãno, “Caroarã äma,” na ïquēemi Dio. ⁴ Moisépure Dio cü carotirique nipetirijere cáti peoyupi Jesucristo jĩca wame rüjaquēto. Mani maca tiere mani áti peo majiqueti majuucõa. To bairi noa Jesucristore caapi núcubugorãre, “Caroarã äma,” manire ïmi Dio. Cristo manire cü cabai yajibojarique jügori mani netoomi Dio. Cü carotirique mani cáti peo majiquētie to cãnibato quena mani netoo catiomi.

⁵ Moisé ocõo bairo caí ucayupi Dio cü carotiriquere mani cáti Dio mena caroaro mani cãnipere: “Noa nipetirã yũ carotiriquere cáti peorã caroaro Dio mena anicõa anigarãma.” ⁶ Jesucristore caapi núcubugorã Dio mena caroaro mani cãnicõa anipe macare ocõo bairo caí ucayupi Moisé: “Ûmũrecoorpũ wamũ aácõari Cristore, ‘Jãre átinemoũ rui ajã,’ cü caĩpe ä,” ïqueticõaña. ⁷ Ape wame tunu: “ ‘Cabai yajiricarã änana na cãnopũ yepa pupeapũ rui aácõari Cristore cü cawamũ atí rotipe ä,’ tiere ïqueticõaña.” ⁸ Ocõo bairo maca ïrique ä Dio Wadariquepũ cü ye quetire api majirique, tiere api núcubugorique majirioquēe ïro:

Dio ye queti cayoaropũ caí buiorijere bairo me ä.

To bairi mũja caapi majiquētie me ä. Mere Dio ye quetire mũja maji mũja yeripũ. Tiere mũja ame buio maji, caí ucayupi Moisé.

Tie quetirena jã buio teñanucu camajare, Cristore cü api núcubugoya ïrã. ⁹ To bairi tie quetire apiũjari, “Jesu yũ Ûpaũ ämi, jocarã mee,” ïri, “Cabai yajiricũpũre cü catunu catiopyupi Dio,” ïrica wame mani yeripũre mani canúcubugoro mani netoobojagumi cüre canúcubugoquēnare cü capopiyeyepere. ¹⁰ Mani yeripũre Jesucristore mani canúcubugoro, “Cañuurã äma,” mani ï tujũmi Dio. To bairo, “Caroarã äma,” mani ï tujũri

mani netoomi cū capopiyeyebopere. To bairo manire cū canetoobojaro aperāre cabuiope ā tunu.

¹¹ “Jesucristore caapi nūcūbugorā wariñuuriq̄e bugagarāma. Tuḡooñariq̄e paiquetigarāma cūre nūcūbugorā,” ĩ ucarique ā Dio Wadariq̄ep̄ure. ¹² Camaja nipetirāre jīcarore bairo na tuḡumi Dio, judío majare, judío maja cāniq̄eña quenare. Jīcañna āmi mani Ūpañ. Camaja nipetirā Ūpañ āmi Dio. To bairi camaja nipetirā nūcūbugor̄ique mena cūre cajanirāre capee cañuurijere na joo netogumi Dio. “Aperā āma,” ĩricaro mano, jīcaro cōo jetona na jooḡumi. ¹³ Dio ye queti ucarica pūurip̄u ocōo bairo ĩrique ā: “Noa mani Ūpañre, ‘Caroorije yū cātajere yū majirioya,’ cañ jenirāre na netoogumi Dio nare cū capopiyeyebopere,” ĩ ucarique ā. ¹⁴ To bairije cū ĩ jeni majiquēema, Cristore api nūcūbugoquetibana. Cū api nūcūbugo majiquēema, cū ye quetire cabuio ecooquetana aniri. Cū ye quetire api majiquēema nare cabuioparā na camano maca. ¹⁵ To bairi nare cabuioparāre aperā nare na cajoquēpata na buiora aā majiquetigarāma. Dio ye queti ucarica pūurip̄u ocōo bairo ĩ ucarique a: “Seeto wariñuuriq̄e ā caroa quetire Dio yere cabuio teñarā na cabuio teñarā ejaro,” ĩ ucarique ā.

¹⁶ Tie quetire na cabuio ejabato quena capāarā apiḡjagaquēema. To bairona cañ ucayp̄u Isaía tir̄um̄p̄u macacu: “Yū Ūpañ, jā cabuorijere apiḡjagaquēema,” cañ ucayp̄u Isaía Diore cū ĩi. ¹⁷ To bairi Cristo ye quetire apirā jīcaarā cū nūcūbugogārāma aperā tiere na cabuioro.

¹⁸ Judío maja maca Dio ye quetire cabuio ecooquetana me āma na maca. Nairoacā buiori maja nare cabuionucubajupa. To bairije ĩrique ā Dio ye queti ucarica pūurip̄ure:

Dio yere buiori maja na cabuorije ati yepa nipetir̄op̄u jejacoapa.

To bairi nipetir̄op̄u macana api peticoama na cabuorijere,
ĩ ucarique ā.

¹⁹ Apeye m̄jaare yū ĩ buioḡu tunu: Israel maja Dio yere buiori maja na cabuorijere apirā cariape api majibatana. Cariape api majibana quena cabai netoo nūcañupa. Tiere m̄jaare buionem̄u Moisé tir̄um̄p̄u macacu Dio ye queti Israel majare cū caucarica wamere ocōo bairije m̄jaare yū ĩ buioḡa:

“Aperā macare caroaro na yū átibojaḡu. ‘Dio yarā me āma, catuḡooña majiquēna āma,’ m̄ja cañrāre caroaro na yū átibojaḡu.

To bairo caroaro na yū cātibojaro na m̄ja tuḡu punijinigarā,
na tuḡu ḡgoorā,” ĩmi Dio, cañ ucayp̄u Moisé.

²⁰ Cabero Isaía ĩ ocabutiri cū quena ocōo bairo cañ ucayp̄u:

“Yūre camacaquēna maca yūre cabḡawā,” ĩmi Dio. “Yū cāniere cajeniñaquetana macare yū cāniere na yū camajiw̄u,” ĩmi Dio.

Judío maja cāniq̄eña cūre na caapiḡjapere ĩi, cañ ucayp̄u Isaía tiere.

²¹ Judío maja macare ocōo bairo cañ ucayp̄u Isaía nare Dio cū cañriquer̄e:

“Yūre apiḡjari yū mena macana āña,”
na yū ĩ pinucubap̄u yūre cabai netoo nūcanucurāre.

Los de Israel que son salvos

11 ¹ To bairi Israel maja Diore apiḡjaqueti, cūre bai netoo nūca, na cabaibato quena na care majuuquējupi Dio. Yū quena Israel maja yañ yū ā, cū carequetana mena macacu. Abraham p̄rami ani, Benjamín cuti poa macac̄na yū ā. ² Tir̄um̄p̄u Israel majare na cabeje cūñupi Dio cū yarā cāniparāre. To bairi cū cabejericarāre na carequējupi. Dio ye queti

ucarica pūuripū Elías Israel macanare Diopure cū caī wadajāriquere mūja majirā. ³Ocōo bairo na caī wadajāñupi Diore: “Yū Ʋpau, mu ye quetire buiori majare cajiā re peocōañupa. Waibucurāre jā cajiā joe buje mūgobata tuturi quenare carecōañupa. Jīcauna yū rūja mure cāti nūcūbūgonucūu yua. Jīcauna carūjan yū cānibato quena yūre macarā áama, yū quenare jīagarā.” ⁴To bairo cū caīro apii ocōo bairo cū caī yūyupū Dio Elfare:

“Jīcau mee mū ā yūre cāti nūcūbūgonucūu. Siete mil majuu āma yū yarā. Aperā na majuuna na cawericū Baal cawamecūcūre cañuu buequetana āma,” caññupi Dio Elfare. ⁵To bairona bai ati rūmūri quenare. Elfas cū cāna yuteapū jīcaarā camajare Dio cū cabeje cūricarore bairona ati rūmūri quenare na bejecōa aninucumi Dio cū yarā cānīparāre. Na bopaca tūjūri to bairo na bejecōa aninucumi yucū quenare. ⁶Apeye unie caroa wame na cātie wapa mee na bejemi Dio camajare. Na bopaca tūjūri na bejemi cū yarā cānīparāre. Apeye unie caroa wame na cātie wapare na cū cabejeata na bopaca tūju mee átiboumi. Caroa na cātie wapa maca aniboro.

⁷Ocōo bairo ā: Israel maja, “Caroarā āma,” Dio na cū caī tūjūpere caboobajupa. To bairo na caboobato quena, “Caroarā āma,” na caī tūjūquējupi Dio. Jīcaarā cū cabejericarāre, “Caroarā āma,” na caī tūjūyupi Dio. Aperā na majuuna cū nūcūbūgoqueticōari caamoorori manare bairo caapi majiquēna cāñupa. ⁸To bairona na cānaje cutiere ī ucarique ā Dio ye queti ucarica pūuripū ocōo bairi wame:

Cūre canūcūbūgoquēna macare cū yere na caapi majiquēto roque na cājupi Dio. To bairo na cū cātatore bairona ati rūmūri quenare to bairona na áami Dio cūre canūcūbūgoquēnare. To bairi cū ye quetire caapi majiquēna caamoorori manare bairona anicōama. To bairo quena Dio cū cātiere catūju majiquēnare bairona anicōama, ī ucarique ā.

⁹Ʋpau David tirūmūpū macacū cū quena ocōo bairo caucayupi:

Na boje rūmūri macaje quena rooro nare to baiato.

Na popiye tamūocōato na canūcūbūgoquētie wapa.

¹⁰Dio ye quetire caapi majiquēna na anicōato. Capēe popiye tamūorique nare to baiato, caī ucayupi Ʋpau David tirūmūpū macacū.

La salvación de los que no son judíos

¹¹“Judío maja Cristore na canūcūbūgoquēto na re majuucōaricūmi,” caī tūgoōnaquetipe ā. “Cū canetooquetiparā majuu āma,” caī tūgoōnaquetipe ā. Na quenare na netoogūmi Dio cūre na cabai netoo janaata. Ocōo bairo majuu ā. Na canūcūbūgoquēto judío maja cāniquēna macare caroaro na átibojari nare cū capopiyeyebopere na netoomi Dio judío maja cāniquēnare. To bairo caroaro na cū cāto tūjurā, “Jā quena to bairona jā baigarā,” irāma judío maja tunu. ¹²Judío maja Jesucristore na cabai netoo nūcaro, caroaro na cātibojaquējupi Dio. To bairo na cabai netoorique jūgori aperā judío maja cāniquēna macare caroaro na cātibojayupi Dio. To bairi netobūjaro caroaro ani warīñugarāma aperori macana judío maja na quena Jesucristore na caapi nūcūbūgoata.

¹³Mūjaa judío maja cāniquēnare atiere ocōo bairije mūjaare yū ī buio: Cū ye quetire cabuiopāre yū cacūwī Dio, judío maja cāniquēnare cū buioato īi. To bairo yūre cū caī cūepe yū ye paarique cawatoa macaje me ā, yū ī tūgoōna. ¹⁴To bairi yū cabuiorijere caapijūjarā caroaro Dio mūjaare cū cātibojarijere tūjurā jīcaarā yū yarā judío maja na quena

boogarāma muja cabairije cutiere. Muja cabairije cutiere tujurā na quena apiujagarāma jīcaarā. Na caapiujaro na quenare netoogumi Dio. ¹⁵ Judío maja Jesucristore na canucubugoquēto caroare na cajooquejupi Dio, aperā macare cu yarā cāniparāre na cūgu. Judío maja na caapiuja nucubugoquētie jugori aperā macare caroa ānajere na cajooyupi Dio. To bairi judío maja maca na caapiujaro caroa majuu anigaro. Na quena aperā mena Dio yarā capāarā cu cacūrā mena caroa anicōa aninucuriquere bugagarāma cayajiboricarā anibana quena. ¹⁶ Ocōo bairo buio majiorica wame ā cōoriquena mena: Pan āta burua macaje jīca buruaacā cañuata ti burua nipetirona űuu peticōaro. Yucu canucori quena to cacatiata carururi quena catī peticōaro. To bairi wame ā judío majare. Jā űicu cāni jugoricu Abrahāre, “Cañuu āmi,” cu caī tujuyupu Dio. To bairi cu pāramerā quenare, “Caroarā āma,” na ī tujugumi Dio, Cristore caapiujarāre.

¹⁷ Jīcaarā judío maja care ecooyupa Diore na caapiujaquētie wapa. To bairi muja maca judío maja cāniquēna maca Dio yere apiujari muja cabai wajoayupa judío maja Dio yarā na cāniboriquere. To bairi muja quena nare bairona muja cabaiyupa judío maja menare Dio yarā mena jīca majare bairona. To bairi judío maja cāniquetana quenare Abraham pāramerāre bairo jetona cāniparāre muja cacūñupi Dio muja quenare. Jīca poa macana yu yarā na āmaro īi cacūñupi Dio cu ye quetire caapiujarāre. Judío maja, judío maja mee quenare to bairona jīca poa macana cu yarāre na cacūñupi Dio. ¹⁸ To bairi Dio yarā cu cacūricarā aniri, “Judío maja netoro Dio cu camairā mani ā,” ī tūgoōñaqueticōaña. Ocōo bairo maca tūgoōña majiña: Judío majare cabeje jugoyupi Dio caroa quetire caapiujarāre. Na jugori muja quena muja caapiujayupa Dio ye quetire. To bairi, “Judío maja netoro Dio cu camairā mani ā,” ī tūgoōñaqueticōaña.

¹⁹ Ocōo bairo muja īborā: “Aperā cañuuquēna Dio yarā cāniboricarāre na careyupi Dio judío majare, mani maca Dio yarā mani cāni wajoaparore bairo īi.” ²⁰ Cariape to bairo muja īrā. Jesucristore na caapi nucubugoquēto na careyupi Dio. Muja quena Jesucristore muja caapi nucubugoquēpata cu yarā cānare cūquetiboricumi Dio muja quenare. To bairi, “Judío maja netoro Dio mena cāni majuurā mani ā,” ī tūgoōñaqueticōaña. “Dio mena cawatoa cāna mani ā,” ī tūgoōñari cu nucubugoya. ²¹ Judío maja Dio yarā cānibatana cūre na caapi nucubugoquēto na careyupi Dio. Muja quenare to bairona muja regumi muja caapi nucubugoquēpata. ²² Caroaro camajare cātibojau āmi Dio. Caroaro cātibojau anibacu quena tutuaro na popiyeyegumi caroorije cānare. To bairi na careyupi Dio cūre caapi nucubugoquetanare. Muja roquere caroaro cātibojayupi. Cūre muja caapi nucubugocōa aninucuaata to bairona caroaro muja átibojacōa aninucugumi Dio. Cūre muja caapi nucubugocōa aninucuepata roquere muja regumi muja quenare. ²³ To bairona judío maja Diore care ecooricarā na quenare caroaro na átibojagumi Dio na cabai netoo janaata, Jesucristore na caapi nucubugoata. Dio cu carericarā na cānibato quena cu yarāre na cū majimi Dio tunu. ²⁴ Muja maca judío maja muja cāniquetibato quena cu yarā cāniparāre muja cacūñupi Dio. Judío maja maca Dio cu cabeje jugoricarā āma naa. To bairi cu yarā cāniparāre na cū majimi Dio judío maja quenare cu ye quetire na caapi nucubugoata.

La salvación final de los de Israel

²⁵ Yu yarā, atiere cajugoye camaja na camajiquetajere mujaare yu majiogu. “Jā jeto Dio yarā, cu yere camajirā jā ā,” na ī tūgoōñaqueticōato

ĩi atiere mujaare yu buiogu. Ati rumũrire judío maja Israel macana capãarã ama Diore caapiujagaquẽna. To bairona cabairo judío maja caapiujagaquẽna anicõa aninucugarãma. To bairo na cabairo judío maja cãniquẽnare nipetirã Dio yarã cu cabejericarã Jesure na caapi nũcubũgoro bero judío maja capãarã Diore apiujagarãma yua. ²⁶ To bairo Diore na caapiujaro nare cu capopiyeyebopere na netoobojagumi Dio Israel macanare nipetirã cũre caapiujarãre. Tie Israel macanare Dio na cu canetoobojapere ocõo bairo ĩ ucarique ã:

Camajare canetooꝑau Jerusalẽpu cãnacũ atĩgumi.

Jacobo ãnacũ pãramerãre caroorije na cátiere regumi.

²⁷ To bairo caroorije na cátiere na yu camajirioro tirumũpu,

“To bairona mujaare yu átibojagu,”

yu caĩeparore bairona yu átigu, ĩmi Dio, ĩ ucarique ã.

²⁸ Judío maja caroa queti Jesucristo ye quetire bai netoobana Dio wapana bairo cãna ama. To bairo na cabairije jugori muja roque judío maja cãniquẽna maca Jesucristore muja caapiuja jugoyura. Nemoopure na ñicũ jãapure na cabejeyupi Dio judío majare cu camai tũjũparãre. To bairi yucũ quena na mai tũjũmi Dio judío majare, cu wapana na cãnibato quena. ²⁹ “Nare yu cabejewũ yu camai tũjũparãre,” na caĩĩupi Dio judío majare, “Caroaro na yu átibojagu,” na ĩi. To bairo nare cu caĩ cũriquere bairona na átibojagumi Dio, cu caĩ cũriquere camajiritiquẽcũ aniri.

³⁰ Cajuũgoye muja quena Diore cabai netoo nũcarã muja cãĩupa. Ati yutea cãno Dio judío maja cũre cabai netoo nũcarã na cãno tũjũũ muja macare cabopaca tũjũyupi. ³¹ Cabero to bairona baigaro judío maja quenare. Ati yutea cãno Diore apiujaguẽema. Cabero na quenare na bopaca tũjũgumi Dio. Mujaare cu cabopaca tũjũrore bairona na átigumi na quenare.

³² Jĩcaro cõo Diore mani cabai netoorije jugori cabai buicũna mani ã. To bairi mani camaja nipetirãre jĩcaro cõona mani mai tũjũmi Dio cabai buicũna mani cãnibato quena.

³³ Seeto majuu caroaro cáti maji netou ãmi Dio. Nipetirijere camaji peocõau ãmi. Cũ catũgooñarore bairo mani tũgooña majiqueti majuucõa. Cũ cátiere, dope bairo cu cátiye unie quenare mani tũgooña peo majiqueti majuucõa. ³⁴ To bairi wamena ocõo bairo ĩ ucarique ã Dio Wadariquerũ:

Jĩcaũ ĩcũ mácana mani Ɔꝑau Jeová cu catũgooñarijere camajii máni majuucõami. Jĩcaũ ĩcũ mácana, “Ocõo bairo maca cátiye ã,” Diore caĩ majii máni majuucõami.

³⁵ Noa, “Yu wapamomi Dio, apeye uniere cu yu cajoorique wapa,” ĩ majiña maa.

³⁶ Ati umũrecoo macaje nipetiro cu cátaje jeto ã. Cũ jugori nipetirije ati umũrecoo macaje bainucu. Nipetirije cu cacugo wariĩnuupe jeto ã. To bairi cũre mani átĩ nũcubũgocõa aninucugarã Diore. Amén.

La vida consagrada a Dios

12 ¹ Yu yarã, caroaro mani cabopacoo tũjũyupi Dio manire. To bairi Dio cu caboorijere cána anicõaña muja quena. Cũ yarã jeto anicõaña, caroorije átiquẽnana. To bairona cãninucurã muja cãno muja tũjũ wariĩnuugumi Dio. Diore, “Mu yu nũcubũgo majuucõa,” cu irã to bairona cãnicõa aninucupe ã. To bairo caroaro na anicõato ĩi seetobuja mujaare yu ĩ buio atiere. ² Ati yepa macana Diore canũcubũgoquẽnare bairo aniqueticõaña. Cajuũgoye nare bairona ñuuquẽto muja

catũgooñabatajere wajoacõari, caroa macare tũgooñaña. To bairo ána, “Ocõo bairo boomi Dio,” mũa ĩ majigarã. “Atie maca caroa macaje ã, atie maca Dio cũ catũjoorije ã,” mũa ĩ majigarã.

³Dio yũre mai tũjuri cũ ye quetire mũaare cabuiopare yũ cacũũupi. To bairo mũaare cũ cabuiõ rotiricũ aniri ocõo bairo mũaare yũ ĩ buio nipetirãre: “Cãni majuu yũ ã, aperã netoro cáti majii yũ ã,” ĩ tũgooñaqueticõaña mũaa. Ocõo bairo maca tũgooñaña: “Diore apiũjari yũre cũ cáti majiori wame cõona yũ áti maji,” tũgooñaña mũaa. ⁴Buio majiorica wame mena mũaare yũ buiopa: Mani rupau jĩca rupau anibato quena capee pauri ricawati. Tie nipetirijena jĩcaro cõo me ã. Mani cape mena mani tũju maji. Mani amoorori mena mani api maji. Mani rũpori mena mani aá maji. Ricatiri jeto átaje ã. ⁵To bairona mani bai Jesucristore caapiũjarã. Capãarã anibana quena jĩca poa macana mani ã, jĩca rupare bairona, Jesure caapiũjarã mani cãmata. Mani nipetirã jĩca rupau ani turoricarore bairona mani ã.

⁶To bairi Jesucristore caapiũjarã mani cãno to cãnacãure mani joomi Dio ricati jeto mani cáti majipa wamerire, ricati mani caame átinemopa wamerire. Mani mai tũjuri mani cáti majipa wamerire noo cũ cajoogarijere mani joomi. To bairi to cãnacãuna caroaro cátiye ã manire cũ cajoori wamere. Jĩcaarãre cũ ye quetire buio majiriquere joomi Dio. To bairi nare Dio cũ cabuiõ rotiri wame cõona caroaro na buioato Cristo ye quetire. ⁷Aperãre na cũmi Dio aperãre cátinemoparãre. To bairo na cũ cáto caroaro aperãre na átinemoato. Aperãre Dio Wadariquere bue majiriquere na cũ cajooro caroaro aperãre na bueato. ⁸Aperã caroaro catũgooña ocabuti majirã una caroaro aperãre tũgooña ocabutiriquere nare na buioato. Noa niyeru, apeye uniere cajoora wariũuurique mena na joato, na ye cãnibopere tũgooñaquẽnana. Noa jugo áti majiriquere Dio na cũ cajooro caroaro na yarãre na jugo áticõa aninucuaato. Noa cabopacarãre cátinemorã wariũuurique mena nare na átinemoato.

Deberes de la vida cristiana

⁹Aperãre mairã, na mai riata majuucõaña. Caroorije átajere teeya. Caroa átaje macare áti ũjacõa aninucuña. ¹⁰Jĩcaũ punaare bairo mani ã, Cristore caapiũjarã aniri. To bairi caroaro ame mairi ame átinemoña. Mũa majuuna mũa camairo netoro aperã quenare na maiña.

¹¹Tũgooña ocabutirique mena mũa cátiya wamere caroaro ája. Teeye paiqueticõaña. Mani ũpau Dio cũ catũjoorijere caroaro wariũuurique mena ája.

¹²Caroaro majuu mani átibojagũmi Dio ĩrã wariũuucõa aninucuña. Mũa capopiye tamõata tũgooña tutuaya. Diore cũ jeni nucubugocõa aninucuña.

¹³Aperã Jesucristore caapiũjarã bopacooro na cãmata, na átinemoña. Aáteñari maja mũa tũpu na caejaro caroaro wariũuurique mena mũa tũpu na ani rotiya.

¹⁴Rooro mũaare cãnare, “Rooro mũaare to baiato,” na ĩqueticõaña. Caroaro na cabaibe macare Diore na jenibojaya.

¹⁵Noa cawariũuurãre na wariũuunemoña. Aperã cayeri tũgooñarique pairãre tũgooña ocabutiriquere na buioya.

¹⁶Caroaro wariũuurique mena jĩcaro mena ame jugo anicõaña. “Aperã netoro cãni majuu yũ ã,” ĩ tũgooñaquẽja mũaa. “Cawatoa cãcũ yũ ã,”

macare ĩ tũgooñaña. To bairi, “Caroaro camajii yu ā, aperā netoro,” ĩ tũgooñaquēja.

¹⁷Aperā rooro mũaare na cátibato quena rooro na áti amequēja. Cañuuriye, cariape macaje jetore ája, aperā, “Caroaro cána āma,” mũaare na caĩparore bairo. ¹⁸Aperā nipetirā menare caroaro na mena jũgo áti anicóaña mũa cáni majiro cõo. ¹⁹Yu yarā, yu camairā, aperā rooro mũaare na cátibato quena rooro na ame átiquēja. Dio maca na popiyeyegumi rooro mũaare na cátie wapa. Dio ye queti ucariica pũuropu ocõo bairo ĩ ucarique ā:

“Yuna yu ā camaja caroorije na cátie wapa nare capopiyeyepau.

Cariape nare yu popiyeyegu,” ĩ buiomi mani Урау, ĩ ucarique ā.

²⁰Ape wame quenare ocõo bairo ĩ ucarique ā:

Mũaare catũju tutii ũcu quenare cu cañigo raaata cu nuña.

Ocore cu caetigaro quenare cu tĩaña. To bairo mũa cáto rooro mũaare cu cátajere bobogumi, ĩ ucarique ā.

²¹To bairi aperā rooro mũaare na cátibato quena rooro na ame átiquēja. Rooro nare mũa caame ápata netobũjaro rooro majuu ame átaje aniboro. To bairo cabairo ñuuqueti majuucõaboro mũaare. To bairi caroa macare na ája. Caroa macare na átiri nare mũa netogarā.

13 ¹Dio majuuna āmi ati yepa macana carotirāre cacũ. To bairi Dio cu cacũricarā āma ũparā. Cu majuuna cu cabejericarā āma ũparā cána. To bairo cu cacũricarā na cáno írā mani nipetirā nare caapiũjaparā mani ā. ²Noa ati yepa macanare carotirāre cabai netoorā una Dio cu cacũricarārena cabai netoorā āma. Na cabai netoorije wapa popiye tamõogarāma. ³⁻⁴Carotirāre na cacũñupi Dio caroaro mani cáni wariñuuparore bairo ĩi. Caroaro cána maca ũparāre na uwiato ĩi mee na cacũñupi Dio ũparāre. Rooro cána maca ũparāre na uwiato ĩi na cacũñupi Dio. To bairi ũparāre uwiqẽnana caroaro na mena anigarā caroaro ája. To bairo caroaro mũa cáto, “Caroaro mũa áa,” mũa ĩgarāma naa. Caroorije cána maca mũa cāmata uwiya, cariapena manire popiyeyegarāma írā. To bairo rooro cānare capopiyeyeparā na cacũñupi Dio ũparāre. ⁵To bairi ũparāre na apiũjaya, mani popiyeyerema ĩ tũgooñari. To bairi, “Na carotirije cariape macaje ā,” ĩ tũgooñari nare apiũjaya. ⁶Camajare caroaro nare cajuõ aniparāre na cacũñupi Dio ũparāre. To bairi Dio nare cu cáti rotiriquere ánama írā na ye paarique wapa gobierno ye cānipe wapa na cajenirijere cawapayepe ā.

⁷Cariape wapayeya nipetirāre na mũa cawapamorijere. Niyeru gobierno ye cānipe ũparā na cajenirije quenare na wapayeya. Mũa ũparā nipetirāre caroaro nucũbugorique mena na apiũjaya.

⁸Aperāre wapamo mũgonucuqueticóaña. Wapamorique mena ānaje ñuuquēe. To bairi caame mairā maca āña. Aperāre camaii Dio cu carotirique cõona cácu āmi cu ũcu. To bairi aperāre na maiña. ⁹Dio cu carotirique ocõo bairo ĩ ucarique ā: “Áti epericarā cutiqueticóaña. Jiaquēja. Aperā yere jee rutiquēja. Aperā na cátiere ĩtoqueticóaña. Aperā yere tũju ũgooqueticóaña.” Ape wameri ā Dio cu carotirica wameri. Tere tũju neo nucori ame maiña. Mũa majuuna mũa camaiore bairona aperāre na maiña. Ti wame, “Ame maiña,” Dio cu carotirica wame mani cápata Dio cu carotirica wameri cáno cõo cáti peorā mani anigarā. ¹⁰Aperāre camaii ũcu rooro na átiquēcumi cu tũ macanare. To bairi aperāre na mani camaiata Dio cu carotirique cáno cõo mani áti peocõagarā.

¹¹Mani cāni yutea yucuaçāna petigaro ī tūgooñari caroaro maja catíya. Casanirāre bairona, catūgooñaquēna aniqueticōaña. Caroaro tūgooñaña Jesu cū catunu atípere. Petoacā ruja Jesu tunu ejari ũmurecoorũ cū yarāre cū cajee aáparo. Nemoo Jesure cawama apiujarā ānapũ, “Cayoato bero cū tũpũ mani jee aágumi,” mani caī tūgooñanucubarũ. Yucuaçā mani maji: Petoacā ruja Jesu manire canetoo catiõn cū catunu rui atíparo. ¹²Camaja ati yepa macana rooro na cáti ānona tunu atígumi Jesu. To bairi ati yepapũ caroorā watoapũ mani cāni yutea petoacā mena peticoato bai. Yucuaçāna Jesu cū yarāre manire jee aágumi cū tũpũ, caroorije camanopũ. To bairi ati yepa macana caroorije na cátinucuriye uniere cáti janaparā mani ā. Caroa macaje Dio cū catũjoorije macare cátinucupe ā. ¹³To bairi caroa jetore cáti anicõa aninucupe ā. Boje rumũ cāno rooro camaja na caī epe awajariye unie cāna mani aniquēna. Caeti cumuqueticõape ā. Áti epericarā cacūgoquetipe ā. Mani ame wada canamuqueticõato. Aperāre mani caugoo tūgooña netoo nũcaqueticõape ā. ¹⁴To bairi mani Ũpau Jesucristo cū cátinemoriye mena caroa macaje maca áticõa aninucuaña. To bairo áticõa aninucuri caroorije muja cátibopere tūgooñaqueticõaña.

No critiques a tu hermano

14 ¹Jĩcaarā Jesure nũcũbugobana quena cū ye quetire caroaro api majiquēema. To bairo caroaro caapi majiquēna na cānibato quena na mena caroaro āña. Na catūgooñabati wamerire cawatoa macá wamerire bairo na caĩrije na mena ame wada canamuqueticõaña. ²To bairo tunu jĩcaarā Jesu ye quetire caroaro apiuja majiquetibana, “Waibũcũ rire jā caugaata caroorije jā átiborā,” ī tūgooñabanama. Aperā maca, “Ũgarique nipetirije ũga rotirique ā,” ī tūgooñama naa. ³To bairi nipetirijere cauganucurā waibũcũ rire caugaquēna macare, “Catūgooña majiquēna āma,” nare na ī wada paiqueticõato. Tere caugaquēna maca, “Dio cū catũjooquētiere áama,” na quena nare na ī wada paiqueticõato. Dio yarā anicõama, cū ye quetire canũcũbugorā aniri. To bairi nare na wada paiqueticõato. ⁴Apeĩre capaabojaure, “Caroaro mũ Ƴpauũ cū mũ átibojaquējupa,” cũre mani ī majiquēna. Cũ Ƴpau jĩcaũna āmi, “Caroaro yũre mũ átibojayupa,” caī majii. O, “Caroaro yũre mũ átibojaquējupa,” caī majii āmi cũ Ƴpau. To bairona ā Jesu yarā quenare. “Caroaro yũ átibojama,” o, “Caroaro yũ átibojaquēema,” jĩcaũna āmi mani Ũpau Jesu to bairo manire caī majii. Caroaro mani cáticõa aninucuro roque mani átinemo majimi mani Ũpau.

⁵Jĩcaarā, “Ti rumũ cāno Diore cáti nũcũbugope ā ape rumũri netoro,” ī tūgooñarāma. Aperā maca, “To cānacā rumũ jĩcaro cõona Diore cáti nũcũbugocõa aninucupe ā,” ĩma. To bairi mani nipetirā mani cátiere, “To bairo yũ cáto caũuuriye ā,” cariape mani caī majiri wame jetore cátiye ā. ⁶“Jĩca rumũ ape rumũ netoro Diore cáti nũcũbugope ā,” caĩi ũcũ Dio yũ cátiere cū tũjoato ĩi to bairona ĩimi. Apeĩ, “To cānacā rumũ jĩcaro cõona Diore cáti nũcũbugope ā,” caĩi ũcũ cū quena Dio yũ cátiere cū tũjoato ĩi to bairona ĩimi. Apeĩ ũgarique nipetirijere caugau ũcũ Diore tūgooña nũcũbugori ũgaumi. Ũgari, “Caroaro yũre mũ jooyupa,” ĩimi Diore. Apeĩ waibũcũ rire caugaquēcũ ũcũ to bairona Diore tūgooña nũcũbugõn ũgaquēemi. Cū quena cū ũgarique oteriquere, “Caroaro yũre mũ jooyupa,” ĩimi Diore.

⁷⁻⁸Mani nipetirā mani Ũpau Jesu yarā aniri cũre canũcũbugoparā mani ā. To bairi catirāna mani majuuna mani cānipere carotirā mee mani ā.

Mani cabai yajipe quenare mani majuuna mani roti majiquêe. Mani cabai yajiro bero quena Dio yarã aniri cûre cáti núcubugoparã mani ã. To bairi catirãna, o bai yajirã quena mani Upau Jesu yarã cûre canúcubugoparã mani ã. ⁹To bairona cûre mani canúcubugoparore bairo ïi manire cabai yajibojayupi Cristo. Cabero catunu catiyupi. Cabai yajiricarã Upau, cacatirã Upau quena anigu cabaiyupi Cristo.

¹⁰Muja yarã Jesure canúcubugorãre, “Rooro áama,” nare ï wada paiqueticõaña. “Catugooña majiquêna ãma,” nare ï tujũ requeticõaña. Mani nipetirã Dio tũpũ mani caejari paũpũ dope bairo mani cátajere tujũ cõõnagumi Cristo. Nipetirã mani cátajere tujũ majiri, “Caroa muja cápũ o rooro muja cápũ,” manire igumi topũre. To bairi muja majuuna aperãre, “Rooro áama,” na ï buio bate wada paiqueticõaña. ¹¹Ocõo bairo ï ucarique ã Dio Wadariquepũre:

“Cariape majuu yũ ï,” ïmi mani Upau Dio cãnicõa aninucũ.

‘Camaja nipetirã yũre áti núcubugori yũ tuna rũropatuapũ
ejacumugarãma. Nipetirã, ‘Muna mu ã Dio, caroau,
catutuau majuu,’ yũre ï núcubugogarãma,” ï ucarique ã.

¹²Ti wame ucarica wame queti apirã mani maji. Mani cãno cõorena manire jeniñagumi Dio ati yepa ãnapũ mani cátajere.

No hagas tropezar a tu hermano

¹³To bairi, “Dio cũ catũjooquẽtiere mũ áa,” caame ï wada paiquetipe ã. Aperã mani yarã Jesure canúcubugorã unare caroorije na cáto cátiqueticõape ã. ¹⁴Mani Upau Jesucristo yau aniri ocõo bairije yũ ï maji: Ugarique jĩca wame uniere, “Caũga rotiya manie ã,” ï majiña maa. Apeĩ maca jĩca wame ugariquere, “Dio cũ catũjooquẽtiere yũ átibou tiere yũ caũgaata,” ï tũgoõnũmi. To bairo caĩ tũgoõnũ aniri cariapena cabai buicũcũ anibõmĩ tiere cũ caũgaata. ¹⁵Aperã na caũga rotiquẽtiere muja caũgaata apeĩ rooro cũ catũgoõnũro muja átiborã. Cûre camaiquẽnare bairo muja aniborã. Cũ quenare cũ cabai yajibojayupi Cristo. To bairi apeye uniere muja caũgagarije jũgori apeĩ Cristore núcubũgo janaremi ïrã ugaqueticõaña. Cũ mairã ugaqueticõaña. ¹⁶“Yũ cátaje cutie ñuubuja,” ï majibana quena aperã, “Rooro áama,” yũ ïrema ïrã tiere átiquẽja. ¹⁷Mani Upau Dio ye macaje me ã mani ugarique, mani etirique macaje. Dio ye majuu me ã tiea. Ocõo bairije maca ã cũ ye macaje majuu cũ carotirije: Cariape átaje. Aperã mena caroaro ãnaje. Cũ Espĩritu Santo jũgori mani cãni wariñuurije. Tie maca cañuu netorije majuu ã. ¹⁸To bairije Jesucristo cũ caboorije cãnare, “Caroarã ãma,” na ï tujũ wariñuũmi Dio. To bairona, “Caroarã ãma,” na ï tujũnucuma camaja aperã quena to bairo cátinucurãre.

¹⁹To bairi caroa macare mani ána, aperã mena caroaro anigarã. Jesucristore mani caapiũja nutuaparore bairo cátnemopa wamerire mani ána. ²⁰To bairi apeye uniere muja caũgagarije jũgori aperã Diore na canúcubũgo janaro roque na átiquẽja. Ugarique nipetiri wame caũga rotirije ãno. To bairo to cãnibato quena apeĩ, “Tiere caũgaquetype ã,” caĩ tũgoõnũ ïcũ tiere muja caũgaro tujubõmĩ. To bairi tiere yũ caũgaro tujuri Diore núcubũgo janaremi ïrã ugaquẽja. ²¹Apeĩ Cristore apiũja janaremi ïrã, “Tie mani caũga rotiquẽtie ã,” cũ caĩrijere caũgaquetinucuparã mani ã. To bairona vino na caĩrije camesũorije caetiquetype ã. Noo apeye unie rooro cũ cáto cátiquetype ã manire.

²²“Diore caapiũjarã aniri nipetiri wame uga rotirique ã jãre,” caĩ

tugooñarã muja cãmata muja majuuna Dio jeto cu caapi majiro to bairona i tugooñacõaña. Aperãre, “Nipetiri wame uga rotirique ã,” i buio batericaro mano to bairona i tugooñacõaña. Aperã mena tiere ame wada netoquẽja. “Dio cu catujuro atiere yu cáto ñuubuja,” cariape caĩ tugooña majii ũcu wariñuumi. ²³ Apeĩ maca, “Dio cu catujuro atiere yu caugaro ñuubuja,” caĩ tugooña majiquẽcu ũcu bai buicucumi cu caugaata. “Tiere yu caugaro ñuuquẽto,” i tugooñabacu quena tiere ugari bai buicucu baiimi cãa. To bairi noo cãniere mani cátiẽ, “Tiere yu cáto ñuuquẽ,” i tugooñabana quena ti wame mani cápata caroorije mani átiborã.

Agrada a tu prójimo, no a ti mismo

15 ¹ Jesucristo cu catujoorijere caroaro catugooña majirã maca aperãre wada paiquẽnana canucape ã. “Na catugooñari wame ñuuquẽ,” nare caĩ wada paiquetipe ã, Jesucristo yere caroaro catugooña majiquẽna macare. “To bairo cátiquetipe ã,” na caĩ tugooñari wamere mani quena cátiquetiparã mani ã, apiũja janarema irã. Mani majuuna mani cáti wariñuuri wame jetore cátiquetipe ã manire. ² Aperã mani tu macana na catuja wariñuupe macare cátiẽ ã. Cristore seetobuja na apiujanemoato irã na catujoorije macare mani ána. ³ Cristo cu quena cu majuuna cu cáti wariñuuri wame cátiquẽjupi, manire popiye tamuobojau. Ocõo bairo i ucarique ã Dio ye quetire ucarica pũuripu Cristo cu Pacure cu caĩriquer: “Mure caĩ tutirã rooro mure na caĩ eperije nipetirije yurena rooro i eperã ãma.” ⁴ Tirũmũpu Dio ye queti ucarique nipetirijere cacũñupi Dio, tiere caroaro camaja na majiatio ñi. To bairi tie quetire majirã, “Dio, ‘To bairo mujaare yu átibojagu,’ cu caĩrique cõo mani átibojagumi,” mani i tugooña wariñuu ani maji. To bairo i tugooña majiri, mani nũca maji, popiye manire to cabaibato quena. ⁵ Popiye manire cabairije to cãnibato quena mani canuca majiro áami Dio. Mani catugooña ocabatiro áami Dio. To bairi Jesucristo cu caboore bairo muja quenare caroaro muja caame jũgo ãno, jĩcarore bairo muja cãno roque mujaare cu átibojato. ⁶ To bairi jĩcaro mena tugooñari Dio mani Ɔpau Jesu Pacure, “Mu ñuu majuucõa,” cãre muja i wariñuugarã muja quena.

El evangelio es anunciado a los que no son judíos

⁷ To bairi, “Jã mena macana ãña,” ñña aperã Jesucristore caapiũjarãre. “Yu mena macana ãña,” manire caĩñupi Jesucristo quena. To bairo cu caĩricarore bairona caroaro ñña muja quena aperã Jesucristore caapiũjarãre. To bairo caroaro muja caĩ nũcubũgoro tũjurã aperã cariape, “Caroaro áami Dio,” caĩ nũcubũgorã anigarãma na quena. ⁸ Judío majare na átinemoũ acã cabaiyupi Cristo, yu i. Jã ñicu jãre Dio nare cu cabuoricarore bairona cájupi Dio, Cristore cu jou. To bairi Dio, “‘Caroaro yu átibojagu,’ cu caĩrique cõo cariape cáti maji peou ãmi,” mani i maji. To bairo mani caĩ majiparore bairo ñi cájupi Dio. ⁹ Aperã judío maja cãniquẽna, “Caroaro mani bopaca tũjuri caroaro manire átibojami Dio,” i majima. To bairi wame na quena na caĩ majiparore bairo ñi cájupi Dio, Cristore jou. To bairona i ucarique ã Diore Cristo cu caĩrica wame:

Aperã tũpu judío maja cãniquẽna na cãnopũ, “Caroau majuu ãmi Dio,” mure yu ñgu. “Mure nũcubũgori mure yu i wariñuu bajagu,” Cristo Diore cu caĩrique caucayupa tirũmũpu macana.

¹⁰ Ape wame quenare ocõo bairo i ucarique ã:

Judío maja aniquetibana quena Dio yarã judío maja menare wariñuuña mja quena.

¹¹ Ape wame tunu ocõo bairo i ucarique a:

Judío maja cãniquẽna, nipetiri poari macana,
“Caroau majuu ami Dio,” mure na i wariñuu bajaato.

¹² Ape wame Isaía quena caucayupi ocõo bairi wamere:

Buiagumi jicau Isaí pãrami. Judío maja cãniquẽna
quenare carotii anigumi. Cũre apiujari, “Caroaro
mani átibojagumi,” i tugooñagarãma judío maja cãniquẽna.

¹³ Dio caroaro manire cu cáti bojapere tugooñari mja tugooña wariñuu maji. To bairi caroa ani wariñuurique mjaare cu joato Dio cũre caapiujarã mja cãno. Cu Espiritu Santo mjaare cu átinemoato, “Caroaro manire átibojagumi,” netobujaro mja cai tugooña majiparore bairo ii.

¹⁴ Yu yarã, mja cãniere ocõo bairo caroaro yu maji: Caroaro cána mja a. Jesucristo yere caroaro camajirã mja a. To bairo cána aniri caroaro mja ame buio maji mja cãnipere. ¹⁵⁻¹⁶ To bairo caroaro mja cabaibato quena tutuaro mena mjaare yu uca queti joo, mjaare buiori. Na caapiriquere na majiritiqueticõato ii to bairona mjaare yu buio atiere. Dio yure mai tujari yu cacuwĩ judío maja cãniquẽnare Jesucristo ye quetire cabuiopare. Judío maja cãniquẽna mja una na quena na apiujaato ii to bairona yu cacuwĩ. To bairi cũre mja caapiujaro mja tju wariñuugumi Dio. Mja tju wariñuuri cu Espiritu Santo jugori caroarã cu yarãre mja cõgumi Dio mja quenare. Aperã quenare mjaare bairo cána judío maja cãniquẽnare cu yarã na cõgumi Dio yua.

¹⁷ Jesucristo yure cu cátinemoro mena Dio yure cu cáti rotiriquere caroaro yu áa. To bairi caroaro yu tugooña yu ye paariquere judío maja cãniquẽnare yu cabuiorijere. ¹⁸⁻¹⁹ Cristo yu mena cu cáta je to mjaare yu buionucu. Caroaro na cáti bojayupi Cristo judío maja cãniquẽna quenare cu ye quetire yu cabuiorijere na caapiujaro. Jesucristo yure cu cátinemorije mena yu cabuionucu, caroa macajere yu cátinucu. Espiritu Santo cu catutuarijere cáti iñoowĩ camajare apeye unie tju acuarica wamerire. To bairi yu jugori tiere Dio nare cu cáti iñoori wameri tju caapiujawã judío maja cãniquẽna. Cristo ye quetire buio peocõari yu cabuio teña jugowã Jerusalẽpũ. Buio teña nutua, nipetiropũ Ilírico sawamecutopũ yu cabuio nutua ejoowũ. ²⁰ Cristo ye quetire camaja tiere mai caapiñaquẽna tũpũ yu cabuionucu. Tiere mere camajirã tũpũ, aperã mere na cabuioricaropũ yu cabuionemogaquẽpũ. ²¹ To bairona yu cáti nutuatiere Dio Wadariquepũ ocõo bairo i ucarique a:

Cũ ye quetire camajiquẽnare na i buiogarãma.

Tiere nare na caĩ buioro apirã caroaro api majigarãma
cãjũgoye caapiñaquetana anibana quena, i ucarique a.

Pablo piensa ir a Roma

²² Jesu ye quetire caapiquetinucuricarã tũpũ capee macaripũ buio teñanucubacu mja tũpũ yu cáaa majiquẽpũ mai. Capee niri seeto mja tũpũ aágabacu quena yu cáaa majiquẽpũ. ²³ Yucũra yua ati macaripũ yu buio teña yaparowũ. To bairi mja tũpũ yu aágũ yoaro majuu capee cumari mja tũpũ seeto cáaa ganucubaepũ aniri. ²⁴ España yu aágũ. Topũ aácũ mjaare yu tju neto aágũ. Mjaare tjuũ, jica yuteacã mja tũpũ yu cáni wariñuuro bero España yu caneto aãpere yure mja

átinemogarā. ²⁵Topu cááapau anibacu quena yucucā Jerusalēpu aácu yu áa mai. Topu cána Jesure caapiujarāre átinemou niyeru nare yu joogu. Macedonia macana, Acaya macana yure na cajee aá rotirijere na yu jee aá joobojagu Jerusalén macanare. ²⁶⁻²⁷Macedonia macana, Acaya macana judío maja cāniquēna, “Jerusalēpu cána judío majare Jesure caapiujarāre nare cātinemoparā mani ā cabopacoorāre,” caí tugoñañupa. To bairo tugoñari niyeru cajeni neoñupa, na átinemogarā. To bairo na cātaje ñuu majuucōañupa. Judío maja Dio ye macajere na cabuio jugoyupa judío maja cāniquēna macare. To bairo na cātiboja jugorique wapayerāre bairona áama Macedonia macana, Acaya macana niyeru nare na cajooro cabopacoorāre judío majare. Tie niyeru na cajeni neoriquere na joobojagu Jerusalēpu aácu yu áa mai. ²⁸Tie niyeru na cajeni neoriquere Jerusalén macanare na joo yaparou, Españapu aácu mijaare yu tujū neto aágu. ²⁹Mija tūpu ejau caroa macaje Cristo yere mijaare yu buiogu. To bairo yu cabuioro apirā seeto mija api wariñuugarā. Tie jugori caroaro ani wariñuuriquere mija joogumi Cristo yua.

³⁰Yu yarā, mani Upau Jesucristore canucubugorā mija ā mija quena. Espiritu Santo jugori caame mairā mija ā. To bairo cána aniri seeto Diore yu jenibojaya yu cabaipere. ³¹Judea yepapu cána Jesure caapiujaquēna rooro yure na átiqueticōato írā, Diore yu jenibojaya. Jesucristore caapiujarāre niyeru nare yu cajee aátiere tujuri na ani wariñuato írā Diore jeniya. ³²To bairo Diore yure mija cajenibojaro wariñuurique mena mijaare yu tujū aágu Dio cu cabooata. To bairo mijaare tujū ejau caroaro yu yerijā tujū ani wariñuugu mija tūpu. To bairo yu cabaiparore bairo írā Diore yu jenibojaya. ³³Dio caroa ani yerijā wariñuuriquere cajou nipetirā mija mena cu anicōato. Amén.

Saludos personales

16 ¹Mani yao Febe cawamecūcore mija tūpu co yu joo. Jesucristore caapiujarā Sencrea cawamecuti macapu cānare cātinemoo āmo Febe. ²Capāarāre na cātinemoo āmo. Yu quenare yu cātinemowō. To bairo mijaā mani Upau Jesucristore caapiujarā caroaro mija tūpu co ani rotiya co caejaro. To bairona Jesucristore caapiujarāre na caí nūcubugope ā. Co caboori wamere co átinemōña.

³Aquila, cu nūmo Prisila mena na ñuato. Na ya paupu Jesucristo ye quetire yu cabuio teñaro yure cātinemorā cāma. ⁴Aperā yure na cajāgaro yure cātinemowā. To bairo yure na cātinemoro tujurā na quenare na cajiacōaboyupa aperā. To bairo, “Caroaro Pablōre mija cájupa,” na ñña. Aperā judío maja cāniquēna Jesucristore caapiujarā cāni poari macana nipetirā na quena, “Caroaro mija cájupa,” Aquilare, Prisolare na ī jooma. ⁵Aquila, Prisila ya wiipu Jesucristore caapiujarā canañaponucurā na quena na ñuato. Apeī yu camaii Epeneto cu ñuato. Cūna āmi Acayapu Cristo ye quetire caapiuja nūcubugo jugoricu. ⁶Co ñuato María quena. Pairo majuu mija tūpu ācopu cātinemoñupo Dio ye macajere. ⁷Yu ya maca macana Andrónico, Junias na ñuato. Na quena atopu presopu cajoo ecooricarā cāma. Yu jugoye Cristore caapiujayupa. Jesu cu cabue jugoricarā, “Andrónico, Junias caroaro majuu átinucuma,” na ī nūcubugonucuma.

⁸Apeī mani Upau Jesure caapiujau Amplia cu ñuato. Cu quena yu camaii āmi. ⁹Apeī mani mena Jesucristo ye quetire cabuionemou Urbano cu ñuato. Apeī yu camaii Estaqui cu ñuato. ¹⁰Apeles quena cu ñuato.

Nipetirije caroaro cū cátie tujuri, “Caroaro Cristore caapiujau āmi,” cūre mani ī maji. Aristóbulo, cū ya wii macana na űuato. ¹¹Yū yaū Herodión cū űuato. Narsiso, cū ya wii macana mani űpaū Jesure caapiujarā na űuato. ¹²Trifena, Trifosa na quena na űuato. Na romiri pugarā mani űpaū Jesu yere paanucuma. Apeo mani camaio Pérsida co űuato. Co quena seeto mani űpaū Jesucristo yere paanucumo. ¹³Rufo cū űuato. Mani űpaū Jesure caapiuja netou āmi cū a. Cū paco quena co űuato. Yū pacore bairona yū catujuo āmo. ¹⁴Asíncrito, Flegonte, Ermas, Patróba, Herme, aperā Jesure caapiujarā na mena cāna na űuato. ¹⁵Aperā Filólogo, Julia mena, apeī Nereo cū baio mena, Olimpa, aperā Jesure caapiujarā nipetirā na mena cāna na űuato.

¹⁶Caroaro ame mairique mena ame űuu rotiri, ame tujunucuña. Jesure caapiujarā nipetiri poa macana űuu roti jooma.

¹⁷Yū yarā, apeye mujaare yū buiopa. Anama jīcaarā muja caricawati tūgooñaro, muja caame wada netoro, muja carooye tuaro cátingarā. Nemoona Jesu ye quetire aperā cariape mujaare na cabuoriquire bairo buioquēema. Ricati maca buioma. To bairo cānare caroaro na tujū majiña. Na apiujaqueticōaña. Na bapa cutiqueticōaña. ¹⁸Mani űpaū Jesucristo yere cāna me āma naa. Na majuuna caroorije na cátingarije macare cāna āma. Caroaro api tujooriquere itori, caroaro caapi majiquēnare na macare na caapiujaro ánama. ¹⁹Muja maca caroaro Jesu cū caboorije cāna muja ā. To bairo caroaro muja cáti aniere majima aperā Jesure caapiujarā nipetirā. To bairi seeto mujaare yū tūgooña wariñuu. Caroa macaje jetore muja cáti majipere yū boo. Caroorije macare muja cátiqueto yū boo. ²⁰Caroa ani yerijā wariñuuriquire cajou āmi Dio. Petoacā bero caroorije űpaū Satanāre muja canetoro átigumi, cū macare cū carooye tuaro muja átibojagumi Dio. Mani űpaū Jesu caroare mujaare cū joato.

²¹űuu rotimi Timoteo. Yū mena Jesu ye quetire cabuio teñanemou āmi. Yū ya maca macana Lucio, Jasón, Sosípate űuu rotima na quena.

²²Yū Tersio, Pablo cū caī uca rotiro cū yū ucaboja ati pūurore. Yū quena mani űpaū Jesure caapi nūcubugou aniri mujaare yū űuu roti joo.

²³Gayo űuu rotimi. Cū ya wiipū yū ā, yure cū cāni rotiro. Atopū cū ya wiipū neñaponucuma Jesure caapi nūcubugorā. Erasto ati maca űparā ye nyerure cacotebojan űuu rotimi cū quena. Mani yaū Jesure caapiujau Cuarto űuu rotimi cū quena.

²⁴Mani űpaū Jesucristo caroaro mujaare nipetirāre cū átibojato.

Alabanza final

²⁵⁻²⁶Diore caroaro wariñuuriquire cūre mani joorā. Jesucristo ye quetire, caroa quetire yū cabuorijere muja caapiuja netoro muja áti majimi Dio. Nemoopre tie quetire buoriquire catugooña majiña manibajupa. Ati yūteapre Dio ye quetire cabuoricarā tirumupu macana na caucarique jūgori majirique ā yua. Dio cacaticōa aninucuū maca to bairona na cabuio rotiyupi. Yū quena Pablo tie quetire yū buionucu. Nipetiri yepa macana tie quetire na majiati īi cū yarāre na cabuio rotiyupi Dio. To bairo tie quetire na canūcubugoro, cū caboorije na cáto bou cū ye quetire yū cabuio rotiwī Dio yū quenare.

²⁷Jīcaña āmi Dio nipetirijere camajii. To bairi cūre mani wariñuu nūcubugocōa aninucugarā, Jesucristo yarā aniri. Amén.

To cōona ā.